

INSAIT:

OTML givim luk-
save long ol
PNG Taita...

- P4



Pait egens TB

- P6



Namba 14 bung bi-
long ol meri luteran i
kamap long Boana
las mun...

- P14 na 15



PIH Saveman *Nius*
Pait egens Bres
kensa - Pes 7

**KRISTMAS KADS
LO LAIK
BLO YU**



Only at...
THEODIST LTD
THE STATIONERY SUPERMARKET
Waigani Drive, POM 325 6500
Markham Road, LAE 472 5488
sales@theodist.com.pg saleslae@theodist.com.pg



Pato bungim Obama

Presiden bilong US, Barack Obama wantaim meri bilong em, Mitchell Obama long las wik i bungim PNG Minista bilong Foren Afes, Rimbink Pato wantaim Misis Pato long UN Jenerel Asembli miting long New York, USA.
Lukim stori long pes 20.

Saina kisim planti bisnis long PNG

...Tasol PNG i no kisim long Saina yet

Stanley Nondol i raitim

KANTRI Saina i kisim ol bikpela milien kina wok kontrak, wok long ol maining eria na ranim planti bisnis long stua na ol arapela moa, tasol PNG i no kisim ol wankain bisnis long Saina.

Gavman i no wokim wanpela samt-ing yet long PNG bai kisim bisnis long Saina, wankain olsem Saina i kisim planti bisnis long PNG na mekim bikpela winmani.

Minista bilong Foren Afes, Rimbink Patoi wokim dispela toktok taim em i kam bek long miting bilong Yunaited Nesen Jenerel Asembli long Nu Yok long Amerika loing dispela wik

Em i bin bungim planti lida long ol narapela kantri na ol i laik mekim bisnis long PNG.

Wanpea bilong ol em Singapore, na ol arapela kantri long Esia Pasifik i gat laik long mekim bisnis long kantri bilong yumi.

I go moa long pes 2...

DEBT



Is the weight too much?

Transfer your balance and we will pay off your DEBT.

✓ Low Interest @1% p.m

✓ Suitable Terms & Conditions

✓ Flexible Repayment Terms

✓ Accessible

✓ Affordable

watch your savings grow

Apply Now!

Contact your nearest TISA Office

marketing@tisl.org.pg

www.tisl.org.pg

PORT MORESBY: 300 2200 | LAE: 472 4933 | MT. HAGEN: 542 2733 | KOKOPO: 982 8256 | GOROKA: 532 3511 | ALOTAU: 641 0161 | MADANG: 422 2305

KAVIENG: 984 1177 | WEWAK: 456 1177 | BUKA: 973 9400 | MANUS: 970 9198 | KIMBE: 983 4045 | VANIMO: 467 1398 | POPONDETTA: 629 7406 | IALIBU: 540 1758



Gavman makim nupela PNGCS Komisina

Yakam Kelo i raitim

BIHAIN long 40 krismas wantaim PNG Korektiv Sevises (PNGCS), Michael Waipo nau i kamap nupela Komisina bilong Papua Niugini Korektiv Sevises (PNGCS).



Michael Waipo, nupela CS Komisina.

Minista bilong CS na memba bilong Wewak Jim Simatab i tokaut long disisen bilong nesenel gavman (NEC) long makim bilong Mista Waipo olsem nupela Komisina long kisim dispela opis we i bin stap nating bihain long dai bilong olpela CS Komisina long las yia i kam.

Mista Simatab i mekim bikpela tok klia go long olgeta opisa long pasin bilong rispek na bihainim oda long wok bung wantaim mas stap insait long olgeta woda insait long kantri. Maski bikpela save bilong skul wantaim digri pepa tasol sapos nogat save na eksperiens long wok, yu mas statim wok bilong yu aninit na bihainim lain go antap long top posisen. Em sistem planti lain bin bihainim long ol wok na posisen bilong ol tude long kantri.

Mista Simatab i askim olgeta woda long PNG long wok bung wantaim nupela Komisina bilong ol long lukim olsem menesmen na operesen bilong ranim olgeta haus

kalabus na ol kalabus lain na administresen bilong ol woda mas ron gut.

Olgeta samting bai kamap gut sapos yupela olgeta lusim tingting long ol kain pasin bilong kros na salens long wok na posisen.

Em tok bai Praim Minista bai opim wanpela nupela rivi program bilong ol haus kalabus insait long kantri long dispela mun we gavman i givim pinis K1 milien na nara-pela K1.5 milien bai kam long statim dispela projek long dispela yia. Dispela rivi em ol kolim Nesenel Prison Sistem bilong lukluk gut na glasim sapos olgeta wok na hevi bilong ol haus kalabus insait long kantri i ron gut o nogat. Na wanem kain wok stret bilong mekim na stretim ol haus kal-

abus insait long kantri. Dispela em wanpela bikpela laik bilong Nesenel Gavman, Minista Simatab i tok.

Nupela Komisina Michael Waipo i mekim bikpela tok amamas na tenkyu go long O'Neill Dion Gavman long luksave na wanbel bilong ol long makim em olsem Komisina bilong PNGCS.

Olsem wanpela olpela na eksperiens woda insait long kantri na nau kamap Komisina, Mista Waipo i tok ol bikpela samting em bai lukluk long en na wok long en em; kisim bek na strongim wanbel na rispek bilong olgeta opisa bilong CS long antap menesmen go daun long opisa level. Na bikpela samting em long senisim sampela pasin bilong wok we i ken kamapim amamas na sapot namel

long olgeta opisa go daun long liklik junia o p i s a . Komisina Waipo i tok arapela bikpela samting em long makim bilong ol sinia eksekutiv opisa na menesmen bilong ranim opis na administresen stat long Deputi Komisina Operesen, senisim gut ol rijinol Dairektrets, putim pablik notis long makim posisen bilong Deputi Komisina, ol Asisten Komisina, ol Komisin Opisa na ol Non Komisin Opisa.

Arapela bikpela wok bilong lukluk na stretim em ol wok bilong stretim ol haus kalabus, ol bisnis saplaia bilong ol kago na sevis kam long CS, apim level bilong ol opisa, stretim ol projek we i stap pinis na kamapim gutpela fainens menesmen ripot.

Mista Waipo tok CS i gat bikpela dinau stap wantaim ol lain save mekim wok na givim sevis long CS tasol ol wok klostu tru long dispela long traime stretim na ol inap stretim olgeta dinau ya long pinis bilong dispela yia.

PNGCS i lukluk long neks yia wantaim mak olsem K200 milien baset plen bilong ol we Nesenel Gavman inap skelim long ol long karimaut ol program bilong ol long neks yia. Sapos dispela baset mak i kam gut bai PNGCS inap ranim gut ol program na plen bilong em.

Skul i no sekim gut kago kalt ripot – papa i komplek

Michael Novingu i raitim

Pasin bilong bihainim na wokim kago kalt o lotu long satan long helpim ol long ol skul wok bilong ol long ol sinia hai skul insait long Papua Niugini i kamap strong.

PASIN bilong lotu long satan o kago kalt pasin insait long ol sinia hai skul long Papua Niugini i kamap bikpela.

Long dispela as na Kerevat Nesenel Hai Skul long Is Niu Briten provins i rausim 10-pela sumatin na givim ol balus tiket bilong go bek long ples na papamama bilong ol tupela wik go pinis.

Ol sumatin ol i rausim ol long skul i no wanbel na tok skul Edministresen i no givim ol tok lukaut na karimaut wok painimaut gut long dispela hevi pastaim long ol i go het na rausim ol.

Jack Melki husat pikinini meri bilong em i wokim gret 12 long Kerevat Nesenel Hai skul i tok kros long skul Edministresen na i tok olsem em i no wanbel long ol i rausim pikinini bilong em long skul.

Em i tok olsem pikinini meri bilong em bai i no inap long mekim fainel eksam bilong em nau.

Em i tok olsem pikinini meri bi-

long em i no stap insait long dispela kago kalt grup long Kerevat Nesenel Hai Skul we wok painimaut i no kamap gut long luksave stret husat lain tru pastaim long ol go het na rausim ol pikinini nating long skul.

Melki i tok olsem pikinini meri bilong em save mekim gut skul wok bilong em we ol maks bilong em gutpela na neks krismas em inap go skul long yunivesiti.

Em i tok ol i rausim em nating nogat gutpela as na rekot bilong wok painimaut stret.

Melki i tok olsem em na meri bilong em go long Kerevat Nesenel Hai Skul long lukim bosman bilong skul Ray Rieme Arlo na namba tu bilong em long painim aut as long ol rausim pikinini bilong em tasol tupla bosman ya i no laik toktok wantaim em.

Planti ol arapela sumatin tu we ol i rausim ol i nogat gutpela wok painim long husat sumatin stret i asua long wokim kain kago kalt, Melki i tok.

Dispela hevi inap kamapim moa trabel na hevi tasol polis bin sambai na stopim ol lain husat skul bin rausim ol.

Nupela masin bilong skelim solwara long Kimbe

PAPUA Niugini i kisim wanpela moa taidel gauge, o masin bilong skelim solwara nau i stap long Kimbe bris long Wes Nu Briten.

Em bai bringim namba bilong ol gauge masininsait long kantri i go long 4-pela.

Trenspot Sekta long Opis bilong Klaimet Senis na Developmen (OCCD) na ol patna bilong en i bung wantaim Dipatmen bilong Woks long kamapim ol gutpela masin bilong ivaluesen o wok

glasim na komyunikesen long ol hevi bilong taim nogut na taidel gauge em i wanpela bilong ol. Em i kamap aninit long projek, 'PNG: Bildim wanpela strongpela banis aninit bilong stopim Disasta na Klaimet Senis'.

Dipatmen bilong Woks ipapa long dispela wok wantaim mani helpim bilong Wol Benk UDS 2.6687 milien i kam long gavman bilong Japan.

Ol i komisenim taidel gauge long Kimbe wantaim kontrakta, Ace Tech Limited, wanpela nesenel kampani, i go long Nesenel Maritime Sefti Atoriti (NMSA), Projek Kodineta Crusoe Dili i tok PNG nau i gat gutpela ikwipmen long redi long taim no gut long bihain.

Wol Benk Projek Dairekta (DOW) Steven Sapalo tu i tok strong long nid bilong bungim ol rekot long redi oltaim long wanem ogenaisesen i nidim we bai givim helpim long trenspot sekta.

Eksekutiv Dairekta bilong OCCD, Varigini Badira i tok amamas long seketeribilong Dipatmen ov Woks long ol i go pas long lukluk long hevi bilong klaimet senis na long wok bung wantaim NMSA long monitaim mak bilong solwara.

Mista Badira i tok ol ripot bilong NMSA bai was long ol hevi i ken kamap taim mak bilong solwara i kam antap bikos long klaimet senis na ol arapela sekta olsem woks dipatmen.

Ol i bin makim 10-pela provins husat i save lukim moa disasta, aninit long dispela projek.

Em Manus, Is na Wes Nu Briten, Oro, Sentrel, Galp, Milen Be, Westen, Morobe na Madang provins bai kisim helpim. Ol i makim Galp na Sentral provins long kamap olsem pilot provins long kisim helpim long ditel ris asesmen long glasim gut ol hevi na putim hevi bilong trenspot sekta i kamaut.

Saina kisim planti bisnis long PNG

I kam long pes 1...

Taim mipela i askim Minista Pato sapos em bin bungim ol politikel lida bilong Saina long PNG i ken mekim bisnis long kantri bilong ol long wankain olsem Saina i mekim bisnis long hia.

Saina i ranim Ramu Nico, kisim planti wok long Pasifik Gems na ol planti liklik bisnis tu olsem taia sevis na haus kai.

Minista Pato i tok em i no gat sans long bungim ol lida bilong Saina long toktok long bisnis namel long tupela kantri. Tasol Saina i wok long kisim planti milien kina bisnis long kantri long planti yia i go pinis na i kisim yet.

Wankain taim, Minista bilong Tred, Komes na Industri, Richard Maru i tok nau em i taim bilong gavman i mas lukluk strong long dispela, na kamapim toktok wantaim gavman bilong Saina long PNG i ken kisim ol wok bisnis long Saina. Bikpela komplek i kamap namel



Minista Pato...

long pablik, politisen na ol save-man olsem kampani bilong Saina i kisim bikpela milien wok kontrak bilong 2015 Pasifik Gems long bildim ol gems viles long Pot Mosbi we i no stap long baset bilong kantri.

Saina tu i kisim wok long Ramu Nicco we kampani, MCC bilong Saina i divelopa long Ramu Nikel main.

Planti ol bikpela stoa na ol sampela liklik bisnis inap long PNG i mekim em ol Saina tu i kisim.

Minista Maru i tok bilong wanem na PNG i wok long givim wok long Saina bikos Saina i no givim ol kain wok bisnis long PNG long kantri bilong ol.

Minista Maru i mekim dispela toktok taim em i kam bek long raun bilong em long APEC miting long Saina las wik .

Mista Maru i tok total velyu bilong tred namel long PNG na Saina i sanap long K3904.6 milien long K1.552.7 milien na winim PNG.

Minista Maru i tok dispela em bikpela tru, we lukim Saina i save kisim ol bisnis isi tru long PNG.

Em i tok ol prodak bilong Saina i kam pulap long kantri tasol wankain i no kamap wantaim ol Saina.

PNG salim liklik ro meterel tasol

go long Saina na i no mekim inap winmani.

Minista Maru i tok planti ol samting bilong PNG i no go long maket bilong Saina na ol arapela kantri, na gavman bai kamapim wanpela tred na invesmen agrimen long opim maket bilong Saina long PNG i ken salim ol prodak i go long maket bilong ol.

Tasol Minista Maru i toktok strong olsem PNG i no resis gut long wol maket bikos kos bilong mekim bisnis long kantri em i dia tumas.

Em i tok kos bilong pawa, sip, balus, fuel na ol arapela kos bilong mekim bisnis i dia tumas na winim ol arapela kantri.

Minista Maru i tok gutpela rot long daunim ol dispela kos em long gavman bai opim maket na pulim ol bisnis long ausait i kam insaot long ol bai resis na long dispela rot ol kos bai kam daun.



Namba wan PNG Wimen in Bisnis maikro-benk ejensi bai stap insait long Modilon Haus long Madang. *Poto: James G. Kila*



NUPELA AMBALENS BILONG HELPIM: St Johns Ambalens Sevis long dispela wik i kisim tupela nupela ambalens long Nesinel Geming Kontrol Bod long karimaut gut wok long helpim pablik insait long siti na kantri husat i save kisim sik na bagarap, na ol i no gat rot long go long haus sik. Ol nupela Amblens i kos moa long K300,00. Poto i soim Ekting Deputi Sif Ekjekyutiv Opisa bilong Nesinel Geming Kontrol Bod, Flex Diapong, i givim ki bilong tupela nupela ambalens i go long Gavana Jenerel na Presiden bilong Sen Johns, Gren Sif Sir Michael Ogio, taim ol narapela wok manmeri i lukluk i stap. *Poto Nicky Bernard.*

PNG Wimen in Bisnis opim namba wan maikro-benk ejensi long Madang

James G. Kila i raitim

MADANG taun bai paia lait stret tumora (Fraide) taim bikipela grup mama na meri bai wokabout long prosesio wantaim kain kala klos long lonsim namba-wan PNG Wimen in Bisnis maikro-benk ejensi long Madang taun.

Ol bai stat wokabout o mas long Beits oval long taun i go antap long Modilon Haus we seremoni long lukim lonsing bai kamap.

Dispela PNG Wimen in Bisnis maikro-benk ejensi em namba wan tru long opim dua long Madang long strongim na sapotim wok bilong ol meri, na em namba wan ejensi we hetkwata bilong en i stap long Mosbi.

Presiden na meri i kirapim PNG Wimen in Bisnis oge-naisesin, Janet Sape nau i stap long Madang long redim ol progrem bilong lonsing seremoni.

Em i wok klostu tu wantaim ol ekseyutiv bilong em long Madang long redim ol pepa wok bilong sampela ol mama long rejista na tu, sampela long opim akaun insait long dispela nupela ejensi long Madang.

Misis Sape insait long wanpela intaviu wantaim ol nius lain long Madang i tok PNG Wimen in Bisnis Maikro-benk ejensi long Madang em i namba wan long kantri ausait long NCD.

Em i tok as-tingting bilong kamapim PNG Wimen in Bisnis maikro-benk ejensi long Madang i kamap bihain long bikipela intres na planti

askim i kam long ol lain meri long Madang.

Antap long dispela tu em bihain long Smol na Midium Entaprais (SME) samit we i bin kamap long Madang, planti meri na mama i tok strong olsem wanpela kain benking institusen bilong ol meri i mas kamap long strongim wok bilong ol long sait long bisnis.

Misis Sape i tok lonsing bilong wimens maikro benk long Madang em histori stret bikos em namba wan taim tru long Saut Pasifik rijon long lukim wanpela maikro-benk ejensi i opim dua bilong en long Madang long strongim wok bilong ol meri, na em benking institusen bilong ol meri yet.

Em i tok lonsing long Madang bai lukim ol bikipela lain bilong Benk ov PNG, husat em ol lain i kontrolim benking institusen long kantri tu i stap long givim setifiket long maikro-benk i mekim wok bilong en.

Dispela lonsing long Madang bai lukim tu Siaman bilong PNG Wimen in Bisnis, Gabriel Kapris, husat em foma minista bilong Tred, Komes na Indastri tu i stap.

Ges Spika long dispela lonsing em Gavana bilong Madang, Jim Kas, husat meri bilong em tru Theresa em patron bilong maikro-benk ejensi long Madang.

Misis Sape i salim invitesen tu i go long ol mama na ol meri long ol distrik long Madang long kam lukim lonsing seremoni long tumora Fraide long Madang taun.

grow. business

"A BSP Smart Business Loan helped my small home operation rise to become a Smarter Business."

Ginia Siaguru
Business Owner of Tapioca Delight

grow. business

"A BSP Smart Business Loan helped my small home operation rise to become a Smarter Business."

Ginia Siaguru
Business Owner of Tapioca Delight

☎ 320 1212 / 7030 1212 - 24/7

✉ servicebsp@bsp.com.pg

🌐 www.bsp.com.pg

BSP

PRUDY SUPPORTING PNG AND THE PACIFIC

OTML givim luksave long ol PNG raita

OK Tedi Maining Limited (OTML) i saptim wok bilong promotim ol PNG litresa na luksave long ol PNG raita.

OTML i bin givim awod long olpela Gavana Jeneral na bikpela raita, Sir Paulias Matane. Nem bilong awod em, 'Ok Tedi Maining Laiptaim Kontribusen long PNG Litresa Awod'.

Long dispela yia, dispela bikman i gat 82 krismas i bin kisim luksave long wok long strongim PNG litresa long Crocodile Prais Awod seremoni insait long Mosbi.

OTML Menesing Dairekta na Sif Eksekutiv Opisa Nigel Parker i bin stap long seremoni bilong givim presen long Sir Paulias.

Mista Parker i givim tu *Ok Tedi Maining Buk ov the yia Awod* i go long Leonard Roka Fong, 35 yia bilong Bogenvil husat nau i stap stadi long PNG Stadis na intenesenel Rilesens long Divain Wod Yunivesiti long Madang.

Nem bilong buk bilong Mista Fong em 'Brokenville', tna em i stori long wanpela pikinini, wanpela famili na wanpela nesen bilong Bogenvil.

Sir Paulias na Mista Fong i amamas long OTML i luksave long wok bilong PNG litresa na saptim ol



OTML Menesing Dairekta na Sif Eksekutiv, Nigel Parker i prisanim Ok Tedi Maining Laiptaim Kontribusen bilong PNG Litresa Awod long Sir Paulias Matane long taim bilong 2014 Krokodail Prais Awod.

PNG raita.

Ol narapela rait husat i kisim awod em, iriani Wanma aninit long *Buk bilong Pikinini Awod* long ol pikinini i raitim buk, Diddie Kinamun Jackson i kisim *Kina Securities Awod* long Poetri, Kela Kapkora Sil Bolkin i kisim *PNG*

Semba ov Mains na Petroleum Awod long eria bilong Esei na Jenelisem, Arnold Mundua i kisim *Cleland Famili Awod* long Heritage Raiting, na Agnes Maineke husat i kisim *Pipels Awod* bilong ol Sot Stori seksen.

Krokodail Prais Raita Kompe-



OTML Menesing Dairekta na Sif Eksekutiv, Nigel Parker prisanim Ok Tedi Maining M Buk bilong Yia Awod i go long Leonard Roka Fong. *Poto: OTML Pablik Rilesens*

tisen em nesanel litresi resis. Long dispela yia 600 rait i bin kam long 130 raita long kantri i kamap long dispela kompetisen.

Ol i bin givim nem Krokodail Kompetisen bihain wanpela buk 'The Crocodile' we ol i bin pablisim long 1970 wanpela Papua Niugini

raita, Sir Vincent Eri i bin raitim.

Krokodail Prais Antoloji bilong 2014 i gat 497 pes we ol i bin long sim long dispela taim. Em i gat ol stori, poem na esei i kam long kainkain rait bilong PNG husat i bin go insait long dispela resis.

Aplai nau long Australia Awot skolasip



Aplai nau long Australia Awot skolasip.

LONG Oktoba 1, Australia Hai Komison i bin opimigen ol aplikesen bilong Prestijes Australia Awot skolasip bilong ol yanpela lida bilong Papua Niugini long kisim teseri stadi, risets na profesenel developmen long Australia long 2016.

Namba wan Australia Awod infomesen sesen o bung i bin kamap long Fraide las wik long rijinol PNG Asembli ov Disebel Pesen miting long Pot Mosbi.

Ol i tok pepa na liklik buk i bin go long ol wanwan lain i makim wanwan disabiliti grup long kantri long kisim toksave i go aut long ol netwok bilong ol.

Australia Minista Kaunsila bilong Developmen Ko-

presen, James Hall i tok, "Moa long 2000 Papua Niugini lain i kisim pinis dispela awod stat long 1996 i kam na ol i mekim bikpela wok long PNG.

Dispela yia, ol meri, ol lain i gat disabiliti, na ol lain i wok long ol provins i gat sans long aplai."

"Mi laik strongim yupela long kisim moa yangpela bilong Papua Niugini, olsem ol lain i gat disabiliti na saptim ol long kisim dispela awak bai ken helpim ol long laip taim bilong ol," Mista Hall i tok.

Australia Awod em i helpim bilong Australia long givim samting long PNG long helpim longtaim developmen wantaim ol skolasip long skul bilong

helt, edukesen na lo na jastis.

Long wan wan yia ol i save putim aut 150 Australia Awot skolasip. Hap bilong dispela i save go long ol meri.

Ol i save lukluk long save bilong skul bilong ol, lidasip, wok rekot, wanem kain helpim bai dispela skolasip i givim long developmen bilong kantri na tu ol lain i aplai i mas soim olsem ol i orait long go skul long Australia.

Aplikesen bai pas Februari 16, 2015. Australia Awod tim bai wokim ol promosenel rotso long olgeta hap bilong kantri, we ol bai go long ol provins we i no bin gat planti lain i kisim awod olsem long Manus, Atono-

mas Rijon bilong Bogenvil, Is Sepik, Enga, Wes Nu Briten, Galf, na Oro. Yu ken save moa long ol Awod sapos yu go long websait adres long: www.australiaawards.org.pg.

Australia Awod PNG infomesen Senta igat ol hanbuk na internet long helpim ol lain i aplai long ol yet i ken painimaut moa long ol kos. Igat ol woklain long helpim ol lain i skul pinis long painim wok wantaim nupela save ol i gat.

Senta bilong Australia Awod i stap long Port Tower, Hunter St, Port Mosbi, nae m save op long hap pas 8 i go long hap pas 4 apinun, Mande i go Fraide.

Kusbau Praimeri win long Momase TTQ kwis

James G. Kila i raitim

FOAPELA sumatin na wanpela tisa bilong Kusbau Praimeri skul long Madang taun i soim stret kala long winim ol prais long namba wan TTXQ kwis long Momase rijon i bin kamap long Madang las wik.

TTQ em wanpela skul kwis program i save kamap long Nesanel Brodkasting Kopresen (NBC) Kundu 2 television we planti taun long PNG i save lukim.

Dispela foapela sumatin i makim Kusbau Praimeri skul em Sandra Ralai, Lisapho Wahwah, Gregory Polapen na Sanjay Joseph, na stail meri tisa bilong ol em Naomi Marokiki.

Dispela TTQ kwis i bin kamap long Madang bihain long ol i kamapim long Goroka, Isten Hailans Provins. Na TTQ kwis blong Momase rijon i bin kamap long SVD Memorial Auditorium long Divain Wod Yunivesiti (DWU).

Kusbau i makim Madang provins wantaim Jomba, na Boalim Praimeri skul i makim Morobe provins long praimer i skul kategori. Is Sepik na Sandaun i no bin kamap long dispela TTQ kwis long Madang bikos long trenspot hevi.

Naispela yangpela tisa meri, Mis Marokiki husat i makim Kusbau tu i bin winim prais long open kategori taim em i makim provins bilong em yet Sandaun.

Mis Marokiki i tok dispela TTQ kwis i gutpela samting tru we i opim tingting bilong o sumatin long save long wanem samting i kamap tude long wol na tu insait long kantri PNG.

Em i tok tu olsem long namba wan raun long praimer i lukim

Boalim praimer i bin winim, na Kusbau i kam namba tu, tasol long seken raun Kusbau i strong tru na winim TTQ kwis.

Mis Marokiki i tok tu olsem wanpela gutpela samting long TTQ kwis em ol lain sumatin bilong Kusbau praimer i winim K500 we ol sumatin yet bai serim long baim ol pen, pensil, buk na ol arapela skul samting.

Mis Marokiki i tok tu olsem ol dispela wina long TTQ kwis long Madang bai makim Momase rijon long nesanel taitel we bai kamap long Mosbi sampela taim long pinis blong dispela yia.

Kusbau praimer i skul lowa praimer i kodineta, Martha Aukongo i tok maski olsem ol i gat liklik taim tasol long redi, em i amamas tru olsem ol sumatin bilong Kusbau i wokim gut stret long TTQ kwis.

Misis Aukongo i go long DWU long lukim TTQ kwis na em i guria stret bikos em namba wan taim long lukim hausait ol midia lain i save redim stes long kamapim ol bikpela kwis.

Em i tok dispela i opim ai bilong planti lain long liklik taun olsem Madang we kain samting olsem i no save kamap pastaim.

Bihain long TTQ kwis long Madang, ol lain televisen kru bilong Kundu TV i bin go long Kokopo long Is Nu Briten provins long ranim Niugini Ailan kwis.

Misis Aukongo i tok em sore olsem dispela kwis bai go bek gen long Madang bihain long 5-pela yia ol ogenaisa i tok, tasol em i tok em i gutpela ekspirians tru bilong ol sumatin long Madang long stap insait long kain nesanel TV kwis so.

PNG gat bikpela rekot bilong sik TB

Yakam Kelo i raitim

SIK TB em bikpela hevi long Papua Niugini na planti lain wantaim sik TB save stap long ol taun eria olsem long Mosbi siti.

Dokta Gary Ou'u husat em NCD Helt Edvaisa bin tokim ol manmeri olsem Mosbi siti gat bikpela rekot long ol manmeri i gat sik TB bikos em wangepela hap we planti manmeri save kam na go aut olgeta taim.

Insait long ol setelmen em planti manmeri save kam bung na stap wantaim na dispela i mekim isi long husat i gat sik TB bai givim long ol arapela, Dokta Ouú I tokaut.

Long las wik Fraide em NCD wantaim Wol Vision bin kamap wantaim 57 manmeri husat bai wok olsem helpim woklain o TB Voluntias long raun insait long olgeta komyuniti long karimaut awenes bilong traum daunim dispela sik TB insait long siti.

Dokta Ouú i tok opis bilong em i hat tru long luksave na stopim ron bilong sik TB insait long siti bikos ol manmeri save kam na go na planti i no save pinisim marasin bilong ol. Tupela mun o tripela mun tasol ol ting ol orait na save lusim marasin na taim sik ya kamap strong gen ol kam bek gen long haus sik.

Papua Niugini yumi gat nem long salim gol, kopa na ges go aut long arapela kantri na no gut yumi gat



Praim Minista Peter O'Neill i lonsim pait egens TB las wik.

nem tu long salim sik TB go aut insait long arapela kantri. Bikos long PNG, yumi gat bikpela rekot long planti manmeri gat sik TB moa long ol arapela bilong arapela kantri insait long Pasifik rijon, Dokta Ouú i tok.

Dokta Rends Moke bilong Pot Mosbii Jenerel Haus Sik tu i tokaut olsem haus sik bed long 3 maili

pulap long ol sik TB lain tasol. Klostu tupela o tripela wod em ol TB sik lain tasol na dispela em bikpela namba.

Olsem na em tok bikpela tenkyu go long ol dispela 57 voluntias long puitm han go antap long karimaut dispela helpim wok long raun tok-tok na helpim ol lain wantaim sik TB long ol komyuniti.

Dokta Moke i sapatim tok olsem Mosbi siti tasol i gat bikpela rekot bilong sik TB insait long kantri na mipela mas wok strong nau long daunim dispela wik.

Yumi gat tupela bikpela intanesenel bung bai kamap long PNG long 2015 Pasifik Gems na 2018 APEC miting. Olsem na yumi mas wok strong long daunim dispela sik

long nau yet bipo long ol dispela bikpela bung i kamap, Dokta Moke i tok.

Rekot bilong Helt Dipatmen i soim olsem bikpela lain wantaim sik TB insait long Papua Niugini em ol liklik pikinini na planti stap long ol taun.

Planti em long ol setelmen bikos ol manmeri save bung bung long haus sliip na planti bilong ol dispela hap i nogat gutpela helt sevis o i no save kukim gut kaikai na kaikai we i mekim ol isi long kisim sik TB.

Long ol ples tu em ol manmeri i isi tu long kisim sik TB bikos long no gat gutpela helt sevis, nogat gutpela rot na mani bilong ol helt woka go aut long karimaut ol toksave na awenes.

Long PNG tu em planti manmeri bilip yet long ol poisin na sanguma pasin maski ol lain i kism sik long TB we dispela sik save kam long serim plet kap spun, kaikai buai na long win.

PNG gat bikpela rekot insait long 37 kantri na bikpela rekot moa long Pasifik kantri long sik TB.

Ripot bilong Helt Dipatmen i tok tu olsem ol lain wantaim sik HIV na AIDS na ol kisim sik TB gat bikpela sans moa long dai winim ol lain gat sik HIV na stap. Olsem na ol lain wantaim sik HIV na AIDS mas kisim tes bilong sik TB long sekim ol.

Gavman sainim sik T.B tok promis

NESENEL TB Program na ol patna bilong en wantaim Dipatmen ov Helt i bin holim wangepela bung long Nesenel Helt Opis long dispela wik na sainim wangepela tok promis bilong wok bung wantaim long daunim sik T.B long kantri.

Minista bilong Helt na HIV na AIDS wantaim Gavana bilong Westen Provins wantaim deputi helt sekretre na ol narapela pablik sevan bilong helt na ol dokta bilong T.B na ol narapela strongpela sik i bin kamap long toktok moa long hevi bilong sik T.B na long ol wok i kamap pinis.

Sampela bikpela toktok i bin kamap long bagarap sik T.B i wok long kamapim long Westen Provins na Galp Provins wantaim Nesenel Kapitil Distrik.

Mask planti awenes na wok i kamap pinis long NCD, ripot i kam long NCD helt sevis i soim olsem namba bilong ol nupela lain i kisim sik T.B long NCD i wok long go daun. Nesenel Kepitol Distrik Pablik Helt Dairekta, Dokta Niko Wuatai i tok NCD helt sevis i ting olsem namba bilong ol lain i kisim T.B insait long NCD bai i go antap long 6,000 insait long dispela yia.

Dokta Wuatai i tok, ol i lukim olsem wangepela bikpela hevi em i stap long T.B sapota progrem na transpot.

Ol i kisim pinis 57 T.B sapota long wok wantaim ol lain i gat sik T.B insait long komyuniti bilong ol long was long ol i mas kisim gut marasin bilong ol inap long 6-pela mun.

Bikpela hevi i save kamap long taim ol siklain i no pinisim gut marasin bilong ol na narapela strongpela binatang moa i save kamap we i save bikhet long

marasin.

Em i tok NCD helt sevis bai wok wantaim ol komyuniti bes ogenaiesen long supavaisim ol tritmen sapota.

Em tok tu olsem transpot i stap yet olsem narapela bikpela hevi long mekim wok na tu i no gat gutpela supevisen bilong wok bilong tritmen long siti.

Wankain stori tu i kam long Galp na Westen provins.

Provinsel Disis Kontrola bilong Galp provins, Elvis Toy Pyrikah wantaim wangepela dokta bilong MSF i bin prisanim stori bilong TB kontrol insait long provins.

I gat wangepela provinsel haus sik tasol, wangepela distrik haus sik, wangepela rurel haus sik, 17 helt senta i wok, tupela eben klinik, 62 etpos i op. dispela ol helt institusen i lukautim 121,128 populesen wantaim K200,000 baset bilong wok long T.B.

Bikpela hevi i stap long Galp provins i no gat wokman long sait bilong T.B na tu i no gat gutpela awenes na edukesen long jeneral populesen bai kisim save long dispela sik na wei bilong pasim rot bilong en.

Pyrikah i tok provins bilong em i gat bikpela hevi long sik T.B. em i kamap namba wan sik long kilim i dai ol siklain. Bikpela as em bikos ol siklain i save kisim marasin long haus sik na taim ol i orait liklik, ol i save lusim marasin gen na ol i go bek long ples.

Na taim sik i kamap gen ol i save go long puripuri man long oraitim ol tasol ol i save dai.

Wokman bilong MSF (Ol dokta i no gat mak) i tok olsem long luklik bilong MSF, ol i lukim olsem i no gat wok bung na luksave namel long

gavman na helt edministresen wantaim ol haus sik, klinik na etpos.

Olsem na dispela sik em i stap bikpela yet long provins wantaim ol narapela sik tu. Hevi bilong no gat rot em i putim moa bagarap antap, bilong wanem ol i save yusim wara na solwara tasol long go long ol ples.

Mista Pyrikah i tok sik T.B i kamap namba wan sik long ol pipel i save kam long haus sik tasol long wankain taim tu i gat planti hevi i stap long provins we em i mekim wok bilong daunim dispela sik i hat moa.

Em i nidim olgeta stekholda olsem gavman, edministresen, sios, NGO na ol praivet sekta long bung na daunim dispela hevi.



Elvis Toy Pyrikah, Provinsel Disis Kontrol Program Menesa.

Amiau sapatim gavman fri edukesen polisi

Stanley Nondol i raitim

MEMBA bilong Mosbi Not Is, Labi Amiau, i luksave long ol hevi ol skul na papamama bai karim na i sapatim gavman fri edukesen polisi.

Olsem na em i givim wangepela nupela 15 sita bas na dabol klasrum i go long Holi Roseri Praimeri skul long 6 Mail, Not Is distrik long Pot Mosbi.

Mista Amiau i tok gavman i putim fri edukesen long 5-pela yia na ol skul long kantri bai bungim hevi bilong nogat inap spes long klasrum na ol tisa bai hat wok bikos namba bilong sumatin i wok long go antap long wanwan yia.

Dispela helpim Mista

Amiau i givim bai sapatim skul bikos namba bilong Holi Roseri Praimeri i wok long go antap abrusim 300 long wanwan yia insait long las 3-pela yia taim gavman i putim fri edukesen.

Long dispela wik Tude Mista Amiau i givim nupela 15 sita basem i baim long K100,000 i go long Holi Roseri Praimeri skul na i opim tu nupela K500,00 dabol klasrum bilong skul.

Mista Amiau i tokim ol papmama, skul pikinini, skul bod na ol pablik olsem DSIP mani na ol mani gavman i givim long nem bilong Not Is distrik em i no mani bilong em.

Em i tok em olsem memba i lukautim tasol

long olgeta bai kisim sevis long gutpela rot aninit long loa bilong yusim mani.

Em i tok edukesen em i bikpela samting long bihain bilong pikinini, papamama na kantri. Osem na lukluk bilong em long sapatim edukesen em i nambawan long wok em bai mekim long 5-pela yia em i stap olsem Palamen memba.

"Yupela ol pikinini em yupela ol lida bilong tumora. Yupela ol dokta, pilot na lida bilong tumora. Sapos mi no mekim wok bilong mi olsem memba bilong yupela long helpim yupela long kisim gutpela save bai mi asua", Mista Amiau i tokim ol pipel i bung long skul.

Het tisa bilong skul, Getrude Bade i tok helpim Mista Amiau i givim bai sapatim 39 tisa na 1,800 sumatin.

Mis Getrude i tok em bin hat tru long baim kar bilong skul bikos skul i gat planti nid na kos bilong kar em dia tumas.

Em i tok 15 sita bas memba i givim bai pikim ol tisa long moning na lusim ol long apinun.

Mista Amiau i tokim ol pipel olsem i gat rot long helpim i stap tasol ol skul bod, tisa na papamama i mas kamapim wangepela woking komiti na kam wantaim gutpela plen long kisim gutpela projek we bi stap long pula taim na helpim olgeta sumatin na skul.



PIH Saveman Nius

"I kam long Pacific International Hospital Port Moresby"

Ph: (675) 323 4400 Fax: (675) 323 4600 Website: www.pih.com.pg

Sekim susu bilong yu - I gat senis o no gat?

Oktoaba em i mun bilong toktok long susu kensa long ol meri insait long wol, olsem na PIH tu i laik toktok long susu kensa em i save kamap olsem wanem na wanem kain helpim i stap.

Susu kensa i save kam wantaim kain kain sain. Sampela bai skin klostu long susu i solap o buk long skin o skin i save senisim lukluk bilong en, tasol planti susu kensa i no gat wanpela klia sain long luksve. I gat sampela sain i luk olsem bilong susu kensa tasol planti taim i no save gat kensa.

Tingting long helt bilong yu na Sekim susu bilong yu yet olgeta mun. Yu mas go lukim dokta sapos yu lukim sampela kain senis i kamap long yu. Sapos krismas bilong yu i winim 40 yia o yu stap long mak bilong kisim dispela sik, yu mas go sekap olgeta taim long wan wan yia. Dispela sekap ol i kolim mamogram, na tu dokta bai sekim bodi bilong yu. Sapos ol i luksave long susu kensa hariap, em i gat gutpela sans long oriaitim sik.

PIH bai bringim tripela sejen dokta bilong USA i kam long stretim sik bilong cleft lip na cleft palate i op long mun Disemba. Teksim nem bilong siklain famili o pren bilong yu wantaim wanem hap yu stap long en, i kam long digicel # 7155-8866.

Wok bilong sekim na painimaut kensa i save kisim planti wik long mekim kain kain tes. Taim bilong wet i ken bringim wari na tingting planti long yu. Yu wokim tes pinis na wet long harim wanem kain tok i kamap long sik bilong yu i ken kamapim bikpela hevi long tingting bilong yu. Tasol taim yu harim gut long wanem risal bilong yu, yu ken redim tingting bilong yu long wanem samting bai yu mekim long helt bilong yu. Yu ken mekim plen long yu bai kisim ol marasin na tritmen bilong daunim kensa binatang olsem wanem wantaim dokta bilong yu.

Wanem kain sain na senis yu mas was long lukim?

■ Mak bilong Susu Kensa
Long stat, susu kensa bai i no soim sampela bikpela senis. Kain olsem wanpela buk i ken kamap tasol bai i liklik tumas long yu ken lukim ol pilim. Planti taim, wanpela kain senis long bodi i save kamap long skrin bilong mamogram masin (X-rei bilong susu), we i save mekim ol dokta i laik mekim moa tes.

Sampela taim, ol namba wan sain bilong susu kensa i save kamap olsem wanpela solap o buk long susu we dokta bilong yu i ken pilim. Sapos yu lukim wanpela solap i no raun tumas na i strong tasol no gat pen long, em i save soim kensa. Tasol sampela taim kensa solap bai i no

inap strong, na i no nap raunpela tru. Olsem na em i bikpela samting long yu go sekap long dokta sapos wanpela hap bodi bilong yu i no luk wankain olsem bipo.

Amerika Kensa Sosaiti i tok, wanpela bilong ol dispela kain senis long susu bilong meri i ken soim olsem em i gat kensa:

- solap long sampela hap bilong susu
- skin skrap o i surik go insait
- susu i pen
- ai bilong susu i pen o ai bilong susu i tanim i go insait na i no sanap.
- susu i go ret, i drai o kamap olsem grille, o ai bilong susu i go strong, o olgeta hap bilong susu i go strong
- susu no gut bilong sua i kamaut long ai bilong susu
- wanpela strongpela buk i kamap aninit long han sangana

Ol dispela senis em i sain bilong sampela hevi long bodi we i no gat kensa o boil. Tasol yu mas sekim dokta olgeta taim yu lukim wanpela dispela kain samting long bodi.

Sapos yu o wanpela ol famili bilong yu i kisim tes na soim olsem em i gat susu kensa, yu mas lainim na gat klia tingting long sampela as tingting: Susu kensa em i wanem samting na em i save kamap long wanem rot?

Susu kensa em save kamap taim wanpela kain samting long ol bodi sel we i save mekim skin bilong susu i gro o kamap bikpela. Em i gutpela long save wanem kain we kensa i save kamap.

■ Kensa i save kamap bihain long meri mekim sampela senis long susu bilong em olsem long mekim i go bikpela o katim samting olsem, o sampela narapela kain senis, i kamap long ol blut sel bilong bodi we i save kamapim nupela bodi sel long stap helti. Ol jins o blut insait long kiau bilong sel i save wok olsem kontrol rum bilong wan wan sel. Wok bilong ol sel long bodi bilong yumi em long kamapim nupela bilong ol yet long wanpela kain we: ol nupela helti sel i save kisim ples bilong olupela taim olupela i dai. Tasol sampela taim, bai senis long susu i ken kirapim sampela kain jins i no gutpela na mekim sampela gutpela jins long dai. Dispela sel we i senis i save kamapim strong long karim narapela na i go moa na kamap planti i go inap em i kamapim boil insait long susu.

■ Sampela boil i no save kamapim bagarap long bodi na sampela i save kamapim bagarap long bodi. Ol boil we i no save kamapim bagarap em i no save kamapim kensa tu: ol sel bilong ol i luk olsem wankain tasol long ol gutpela sel, na ol i save kamap nupela gen isi, isi, na ol i no save birua long ol narapela hap blut bilong susu o go long ol narapela hap bilong bodi. Ol boil we i save

kamapim bagarap i save kamapim kensa. Sapos yu no go sekim wantaim dokta, ol dispela sel i save kamapim ol yet na i go long ol narapela hap bilong bodi.

- Dispela nem "susu kensa" i save toktok long boil we i save kamapim bagarap i save stap long sel bilong susu. Susu kensa i save stat long sel bilong ol hap bodi skin o gris i hangamap o solap i kamap long ol hap bilong bodi olsem glen i save kamapim susu bilong bebi long ol rop we save karim susu i go long ai bilong susu i save pas. Sampela liklik, susu kensa i ken stat long ol hap bilong susu we i gat gris.



■ Piksa bilong Susu kensa Bikpela piksa

■ Stap longpela taim, ol kensa sel i ken go insait long gutpela hap bilong susu na i go aninit long han sangana we i gat ol liklik blut i save rausim ol binatang o doti (lymph nodes) long bodi. Sapos kensa kensa sel i kisim ol lymph nodes, em ol i kisim bikpela rot nau long go long narapela hap bilong bodi. Gro bilong susu kensa i save toktok long kensa sel i go karamapim hap bodi winim liklik boil i kamap pastaim. (lukim Gro bilong susu kensa tebol bilong kisim moa save).

■ Susu kensa i save kamap olgeta taim long jinetik abnormaliti (o wanpela rong i kamap long ol jins) Tasol 5-10 pesen bilong ol kensa i save kamap long sampela blut nogut i kam long papa o mama bilong yu, na 85-90 pesen bilong susu kensa i save kamap long sampela paul i kamap long ol jins long taim meri i go lapun liklik na bodi i go slek na bagarap.

■ I gat ol samting yu i ken mekim long helpim bodi i stap helti, kain olsem wei bilong kaikai

gutpela kaikai, lukautim bodi i no ken hevi tumas, no ken smuk, no ken dring planti bia na strongpela dring, mekim ekksesais planti (lainim ol we bilong was long hevi bilong susu kensa). Dispela we bai yu ken stopim sampela rot bilong kisim sik susu kensa, tasol birua i no bai pinis olgeta.

■ I gat planti kain susu kensa i stap. Bagarap bilong Susu Kensa na ol hevi bilong en

■ Ating yu save pinis long ol ripot i tok olsem insait long 8-pela meri, i gat 1-pela meri bai kisim sampela kain susu kensa. Planti pipel i no klia gut na ol i save ting olsem dispela toktok i min olsem, ol na ol narapela meri ol i save long ol i ken kamapim kensa. Em i no tru.

■ Long tok tru em, samting olsem insait long 8-pela meri long USA, i gat wanpela meri, olsem 12 pesen, o olsem 12-pela bilong 100 meri - i ken kisim susu kensa insait long laiptaim bilong ol. Insait long U.S.A, planti lain i save stap laip long 80 yia. Olsem na, em i stret long tok olsem insait long 8-pela meri, wanpela meri long U.S.A husat i kisim 80 krismas i ken save olsem em i ken kisim susu kensa tu. Insait long olgeta 10-pela yia, i gat daunbilo long 12 pesen sans bilong ol meri bai kisim susu kensa.

■ Hevi long wan wan meri i gat planti rot long kamap, kain olsem sik i stap long famili, o long kamapim pikinini, pasin bilong sindaun o laipstail, ples ol i stap long en na ol narapela samting tu.

■ Long kisim moa save long susu kensa risk na ol hevi bilong en, go long Lower Your Risk seksen bilong Breastcancer.org.

Skrin na tes

Ol tes ol i yusim long skrinim na luksave long sik na monitarim wantaim mamogram x-rei, altrasaun, MRI, CAT sken, PET sken, na moa. Em i tru olsem sampela bilong ol dispela tes i stap long Pasifik Intenesenel Haus sik...yu ken painimaut moa long PIH Klinik long Visen Siti. O yu ken ring long 323-4400, o SMS 7155-8866. Ol medikol lain bilong mipela long tripela hap bilong haus sik bai amamas tasol long toksve long yu moa long wanem kain ol skrinim na tes i stap.

Neks wik Trinde long Oktoaba 15, old okta bilong PIH bai toktok long FM-100 long 3 klok i go 4 klok long apinun. Ol bai toktok long sik long lewa o hat, susu kensa na sik bilong maus na nek i op. teksim ol aksim bilong yu i kam long 7155-8866. PIH kona long FM-100 i save kamap long olgeta namba tri Trinde bilong mun.

Meri i no ken wari na tingting tumas!

Oktoaba em i mun bilong tingim susu kensa awenes. Yu no ken wet i go inap em i leit tumas! Sapos yu lukim sampela senis i kamap long susu bilong yu o arere long susu bilong yu, plis yu mas toktok long mipela na bai mipela i putim nem bilong yu long go long 'mamogram' o X-rei bilong sekim susu.

Sapos yu kisim piksa long mammogram em i gutpela wei tru bilong yu ken save olsem yu gat binatang bilong susu kensa o no gat.

PIH em i namba wan haus sik long PNG long givim dispela sevis bilong mammogram...PIH oltaim i save givim yu namba wan sevis... Salim sms o teks bilong yu i kam long 7155-8866



Pacific Internation Hospital:
4-mile (Boroko bus stop) - 323 4400, Specialty Clinic (3-mile) 311 3000
and Vision City - 310 0485 Website: www.pih.com.pg
Text line (for SMS inquiries ONLY) - 7155 8866

Sefti i no stap long planti liklik moto-bot long Madang - Mongali

James G. Kila i raitim

PLANTI ol liklik banana bot we i save ran long ol solwara long Madang provins i no gat sefti samting long sevim ol pasindia long taim bilong birua long solwara i kamap.

Planti taim ol papa bilong ol banana bot na ol skipa bilong bot i no save tingim tumas sefti bilong ol pasindia. Ol i save tingting tasol long kisim mani na no save luk-save long sefti bilong ol pasindia.

Dispela em strongpela toktok Eking Provinsal Disasta Daireta wantaim Madang Provinsal Edministresen, Rudolf Mongali i bin tokaut long en bihain long wangepela bikpela birua i kamap we i lukim wangepela motobot i kapsait wantaim 14-pela pasindia namel long Raikos hai skul na Madang.

Mista Mongali i tok papa bilong ol motobot na ol skipa i mas putim ol plastik o laip saket na ol arapela samting antap long bot long redi long taim bilong birua i kamap long solwara olsem bikpela solwara kirap o strongpela win. Tasol bikpela samting em taim solwara i

kirap o strongpela win, ol bot i mas stopim ran bilong ol.

Dispela birua long Astrolabe Be namel long Madang na Raikos Hai Skul i bin kamap long las wik Mande. 11-pela long ol dispela pasindia i seif bihain long ol i drip long solwara moa long 20 aua inap taim sampela lain i sevim ol. Nara-pela tripela em ol i no painim bodi bilong ol inap long las wiken, we sampela lain long Rempi viles long Not Kos (NCR) i painim bodi bilong wangepela pikinini we i lus wantaim tripela lain ya. Tupela long ol lain husat i lus em tupela hai skul tisa bilong hailans rijon.

Ripot *Wantok Niuspepa* i kisim long las wiken i tok olsem tupela marit long Rempi viles long NCR i painim bodi bilong dispela liklik pikinini long nambis na i salim tok-save na ol disasta opis na polis i bin go kisim bodi na i go putim long mog long Modilon Jeneral Hausik. Tait blong solwara i bin karim bodi bilong dispela pikinini longpela hap tru long Saut Kos long Astrolabe Be i go long NCR na ol i painim long Rempi viles.

Mista Mongali i tok nau long dispela taim klostu long Krismas em



Dispela em wangepela ol banana moto-bot we i save ran long Raikos we i no gat gutpela sefti samting i stap long en na ol pasindia tu i sindaun krangki nabaut.

solwara namel long Madang na Raikos na tu long not kos namel long meinlen na Karkar ailan na Manam em solwara i save kirap.

Olsem na ol papa bilong ol motobot na ol skipa o man i kontrolim bot i mas skelim gut pastaim na ron long solwara.

Em i tok sapos strongpela win, ol moto bot i no ken ron. Moa long en tu, ol papa bilong motobot i mas karim moa zum blong motobot bikos taim bilong solwara i save kaikai zum sampela taim.

Strongpela tok lukaut tu i go long ol motobot na ol skipa we i ran

namel long Karkar na Kubugam long tingim sefti bilong ol pasindia na no ken kisim moa namba bilong ol manmeri. Ol i mas kisim long mas stret, na bikpela samting em i gat gat sampela ol samting bilong sefti i stap oltaim long bot long taim birua i painim ol long solwara.

MOROBE SHOW 2014

STIHL® SUPER SPECIALS IS ON AGAIN

FOR ONLY
K 8,330
Tax Incl.

For every purchase of a **STIHL® MS720 Chainsaw** You walk away with **2x Alaskan Mills** and a **MS180 Chainsaw**, a **Granberg Polo Shirt** and **STIHL Cap**.






Even more gifts for purchases of any other **STIHL®** products during the show period..



A onetime opportunity you must never miss out

Please Hurry while stock lasts

Terms & Conditions Apply

Promotion duration:
1st - 31st October, 2014

* Also 3 Team Milling Race is on again. To participate one must purchase a promo kit to qualify. First come first serve. Even more the Canoe Carving is on again. Come and see for yourself at the UMW stall.



Call: Pom: 325 5766 Lae: 472 2444 Kokopo: 982 9799

Wes Nu Briten Helt wok poroman wantaim PNGCF

Rot bilong ol Makam kisim luksave

WES Nu Briten Provinsel helt nau i wanbel wantaim PNG Kensa Faundesen long daunim sik kensa long provins.

Ol stekholda bilong Wes Nu Briten Helt Atoriti, Gavana bilong Wes Nu Briten na Pasifik MMI i kamapim bikpela awenes long Kimbe taun wantaim bikpela toktok bilong 'Wimen Kensa Privensan Awenes' long las wik.

Ol i holim kibung long Kimbe Independens Pak long wokim fri kensa skrin long sekim binatang bilong kensa na awenes tude.

Mun Oktoba, em i mun bilong luksave long sik kensa long susu na maus, tasol CFPNG bai opim moa dispela awenes long karamapim olgeta kain kensa we i save kisim laip bilong ol meri long kantri olsem tu Sevaikel, susu kensa na kensa long maus.

Program bilong awenes na skring i stat tude long 9 klok moning taim na bai pinis long 4 klok. Bai i gat fri susu kensa skrin na fri maus kensa skrin.



Poster awenes

Long dispela de, awenes kensa hariap na traim long bilong luksave long sevikel stopim bai kamap Kensa

Faundesen tim bai wokim sevei tu long ol i ken kisim klia piksa long wanem kain save ol pablik long PNG i gat long sik kensa.

Sif Eksekutiv Opisa (CEO) bilong Kensa Faundesen, Dadi Toka Jr i tok namba wan samting long dispela kempein em long edukesen, awenes na privensan. Pasin bilong smok tabak, kaikai buai na dring bia em i save kamapim gutpela sans long kisim sik kensa.

“Lukautim famili bilong yu – No ken Smok, No ken Kaikai buai, No ken dring planti bia.”

Dadi Toka Jr. i tok tenkyu long Pacific MMI, Wes Nu Briten Provinsel Helt Atoriti andna Wes Nu Briten Gavana na Edministresen Opisa long dispela program i kamap. Ol narapela lain husat i givim sapot tu olsem City Pharmacy Limited, Colgate, New Britain Palm Oil Limited, na NBC Wes Nu Briten.

Bustin Anzu i raitim

ROT i go long ol ruel ples i ken bringim ol sevis i go long ples, Gavana bilong Morobe, Kelly Naru i tokim ol manmeri bilong Onga/Waffa long Makam, Morobe Provins.

Em ol sevis olsem edukesen, helt, lo na oda, gutpela wara saplai.

Rot tasol i ken mekim ol dispela samting isi.

Gavana Naru i mekim dispela toktok na givim K500,000 sek mani long skruim rot i go long ol ples insait long Onga/Waffa Lokol Level Gavman long Makham i no long taim i go pinis.

Dispela mani em long helpim o sapotim Mema bilong Makham na Minista bilong Hausing Paul Ezekiel, husat i putim wankain mani long stretim dispela. Dispela mani em ol i givim i go long FTM Konstraksen, wanpela kampani bilong Makam yet.

Gavana Naru i tok aninit long lukaut bilong em olsem gavana bilong wanpela bikpela provins, planti nupela samting o program i wok long kamap, we bai mekim planti senis insait long provins.

Em i tok wanpela bikpela program we i mekim planti bikpela samting em dispela program bilong gavman i wok klostu wantaim ol sios o Kristen Sios Patnasip Program (CCPP).

Aninit long dispela program, Morobe Provinsel Gavman i yusim K10 milien long helpim ol sios long provins na kantritu.

Na blesing bilong dispela wok, ol i lukim ol planti senis i wok long kamap insait long Lae siti, hetkwata bilong Morobe provins.

Narapela program em bilong wok poroman wantaim ol helikopta kampani long helpim ol mama na pikinini long ol rurol eria long kam kwiktaim long kisim helpim long Angau hausik.

Em i tok dispela MAMA program o Morobe Aerial Medical Assistance i kisim K1.7 milien.

Dispela mani igo long Manalos Aviation, wanpela helikopta kampani we save go pas long mekim dispela wok bilong kisim ol mama, husait i save hat long karim pikinini na ol bebi, husait i bungim birua long ples tu.

T.B – “Em i pait bilong olgeta lain”- Westen Gavana Wobiro

Frieda Sila Kana i raitim.

WESTEN provins gavana, Ati Wobiro i tok promis olsem em bai yusim olgeta strong na save bilong em wantaim mani em i gat long wok bilong daunim na pinisim tru sik T.B long provins bilong em.

Mista Wobiro i mekim dispela toktok long taim bilong Helt Dipatmen wantaim ol patna bilong em long Nesanel T.B Kontrol Program i bung long Tunde dispela wik long sainim tok promis bilong rausim T.B long kantri.

“Rausim T.B em i pait bilong olgeta lain, na mi stap insait long dispela pait tu!” Mista Wobiro i tok.

Mista Wobiro i tok, taim em i kisim opis tupela yia i go pinis, Westen Provins em i stap bruk bruk na em i tek ova long gavman. Wanpela namba wan samting em i mekim em long senisim CEO bilong Daru haus sik, bilong wanem i no gat wanpela gutpela wok i kamap na ol pipel i wok long dai nating long haus sik.

“Taim mi kisim opis, ol pipel bilong mi long Westen provins i save tok olsem, ‘mipela go long Daru haus sik long dai’ bilong wanem, ol dokta na helt woka i no stap long givim gutpela marasin na lukaut long ol siklain,” em i tok.

Mista Wobiro i tok taim em i go insait long gavman em i rausim CEO bilong Daru haus sik bikos

em i laik senisim dispela kain toktok na lukim helt sevis i kamap gutpela.

Em i putim K2.3 milien i go long wok bilong helt long provins bilong em na em i tok tenkyu long ol developmen patna na ol narapela lain husat i save givim sevis.

“Gavman bai no inap wok long strong bilong em yet,” Mista Wobiro i tok.

Tasol Gavana Wobiro i tok em i gat bikpela belhevi long pasin bilong ol helt wok manmeri long provins.

“Ol dokta bai i go dring i stap o go long painim pis long taim bilong wok na ol siklain bai i wok long dai i stap long haus sik. Mi les tru long dispela kain pasin na nau mi wok long painim wanpela sempion bilong wok bilong daunim sik T.B long Westen Provins. Mi bin ting Sista Joseph em i sempion bilong T.B tasol nau krismas bilong em long wok i pinis na em i go na mi mas painim nupela sempion gen.” em i tok.

“Mi laikim dipatmen bilong helt i givim mi wanpela man o meri husat bai lukim olsem wok bilong rausim sik T.B em i singautim long laip bilong em. Em bai man o meri husat i gat bikpela laik long bel bilong em long sevim ol pipel long dispela sik T.B” Mista Wobiro i tok.

Em i tokim Minista bilong Helt, Michael Malabag wantaim Deputi



Gavana bilong Westen Provins Ati Wobiro i sindaun wantaim Minista bilong Helt, HIV na AIDS, Michael Malabag long taim bilong sainim Tok Promis long helt opis konprens rum long Tunde.

Seketeri bilong Helt, Dokta Daku-lala olsem em i laikim nupela CEO long Daru haus sik bikos em i no amamas long pipel bilong em i no gat gutpela sevis tru.

“Mi laik senisim dispela toktok olsem, Westen Provins em i gat planti mani tasol ol pipel bilong em i stap rabis tru insait long kantri na i no gat gutpela developmen. Mi singaut strong long ol pablik sevan long provins long givim olgeta tingting na strong bilong ol long bringim sevis i go,” Gavana Wobiro i tok.

Bihainim dispela toktok, Mista Wobiro i tok Westen Provins nau i sainim wanpela MOA wantaim Helt Dipatmen long kirapim wanpela helt atoriti insait long provins. Dispela wei bai moa mani i ken go dairek long bringim sevis long helt i go long ol pipel.

Long pinisim toktok, Mista Wobiro i tok em i laik save long as tingting bilong ol siklain i no save pinisim marasin. Dispela em bikos em i tok, sik T.B em i sik bilong ol rabis lain o lain i no gat planti mani.

Olsem na, ating ol siklain i no laik long pinisim marasin na kamap gutpela bikos ol i no gat wanpela mani samting long stap strong long bihain.

“Ating yumi mas kamap wantaim sampela kain program bilong tok amamas long ol siklain long taim ol i kisim marasin bilong ol gut. Kain samting olsem grisim ol wantaim K1,000 o K2,000 sapos ol i pinisim gut marasin bilong ol. Grisim ol long stap laip tu,” Mista Wobiro i tok.

Ol mama long Wes Taraka kirapim asosiesen

James Kila i raitim

OL mama insait long Wes Taraka husat i stap namel long Huon Galp na Lae distrik long Morobe provins i bung wantaim long kirapim wanpela asosiesen bilong ol.

Ol i lonsim nupela asosiesenlong las wik long Lae na kolim kolim Wes Taraka Wimen Asosiesen (WTWA)long las wik Sande long Lae.

Nupela WTWA I kamap long rait taim bikos long planti ikonmik na bisnis developmen i wok long kamap nau long Lae siti.

Ol memba bilong dispela asosiesen em ol mama husat i stap long Wes Taraka long Lae siti, na ol mama i kam long 9-pela distrik long Morobe provins, Madang, Is na Wes Sepik, Niugini Ailan, Hailans na Sauten rijon.

Presiden bilong WTWA, Gari Enna i tokaut olsem ol mama long Wes Taraka i save stap ausait long planti kain developmen, olsem na nau ol i laik bung wantaim na wok long kamapim ol gutpela plen na wok insait long developmen bilong

Morobe provins.

"Mipela i laik stat long daunbilo na go antap o bottom-up plening na dispela planti taim i save stap wantaim ol mama long haus," Misis Enna i tok.

"Mipela i bung wantaim nau long redim mipela yet long wok olsem grup long go insait long ol wok bisnis na developmen long bringim gutpela samting i kam insait long helpim sindaun bilong mipela long komyuniti.

Misis Enna bilong Morobe Patrol Pos long Huon Galp LLG, Huon Galp distrik i tok em i bin go long wan wan haus long Wes Taraka wantaim sapot bilong man bilong em long strongim ol mama long wok bung wantaim long kamapim dispela asosieein. Na bihain long planti wok nau dispela asosiesen i kamap.

"Nau long Morobe mipela i gat gutpela gavman wei redi long helpim mipela, na long dispela rot tasol mi ting olsem ol wok mipela i laik kamapim bai karim kaikai," Misis Enna i tok

Menesa bilong Wod Sevis insait



Ol mama long Wes Taraka, long Lae siti.

long Lae Eben LLG, Hiob Noah, i tok amamas long ol mama husat i bin bung long lonsing olsem em gutpela tru long lukim ol mama i wok bung wantaim long kamapim asosiesen olsem. Dispela i ken helpim ol mama long kamapim trening long sait long kukim kaikai, kamapim ges haus, lainim rit na rait na ol arapela samting long bringim mani olsem infomal bisnis long bringim mani i kam long famili.

Mista Noah i tok i gat planti rot i

stap we ol mama insait long Lae siti i ken bung wantaim long statim wok na go insait long ol bikpela bisnis.

Komyuniti Dvelopman opisa bilong Huon Galp distrik edministresen, Norma Keno, i tok Wes Taraka na Is Taraka sabab long Lae siti i gat planti ol mama i wok nau i stap, olsem na ol i mas wok bung wantaim long kamapim wantaim gutpela tingting long bringim developmen long ples ol i stap long en.

"Mipela i bungim planti hevi nau

long sait bilong seksual abius, bagarapim ol meri, stap rabis nogat mani na no gat wok na ol arapela hevi, olsem na yumi mas wok bung wantaim na painim sampela kain rot long stretim ol dispela kain hevi long komyuniti level," Misis Keno i tok.

"Ol mama long Morobe mas sanap stretim sindaun bilong ol yet long lukim ol gavman sevises i go long ol. Mipela mas putim han wantaim, sanap strong na pait strong long ol rait bilong mipela," em i tok.

ExxonMobil PNG Limited givim leptop long Don Bosco

NAMBA wan kampani i lukautim PNG LNG Projek, ExxonMobil PNG Limited (EMPNG), i bin donetim 30 leptop i go long Don Bosco Teknikollnstitut (DBTI) Pot Mosbi.

Dispela sapot i mekim isi long ol meri sumatin long ol i ken gat sans long gat kompyuta long helpim ol wantaim ol skul wok na long lainim moa samting.

Long taim bilong prisentesen, Sista Alice, em Dairektres bilong Mary Our Help Haus slip bilong ol DBTI, itok tenkyu long EMPNG long gutpela donesen bilong ol na em i tok strong long ol sumatin long yusim gut ol dispela samting long helpim skul bilong ol.

"Dispela sapot bilong ExxonMobil em i bikpela samting na mipela i amamas tru long yu helpim. Planti sumatin i no gat kompyuta," Sista Alice i tok.

"Kompyuta em i gutpela samting bilong ol sumatin husat i stap long teseri level edukesen long mekim ol kos wok bilong ol," em i tok.

Carolyn Lubang, em i wanpela seken yia Masin Fiting na

Mentenens Teknoloji sumatin nai tok tenkyu long ExxonMobil long donesen bilong ol. Em i tok kompyuta bai helpim ol long skul wok bilong ol na ol narapela samting ol i lainim.

Peter Graham, EMPNG Menesing Dairekta, i tok em i namba wan plen bilong kampani long putim mani i go insait long edukesen.

"Mi ting olsem dispela ol leptop bai helpim gut ol dispela yangpela meri sumatin long ol skul wok bilong ol. Nau long dispela taim, teknoloji em i bikpela samting i save helpim ol yangpela long lainim samting, na mipela i gat bikpela laik long dispela donesen leptop bai bringim skul mak bilong ol sumatin i go antap. Taim ol i gat sans long yusim kompiuta na i go long internet em bai opim rot bilong kisim moa infomesen long sapotim save bilong ol." Mista Graham, i tok.

DBTI em i wanpela teseri insitusen bilong Katolik Sios we i save trenim ol PNG sumatin I kamap tisa long tis long teknikal na vokesenel skul na kamap ol teknisen long indastri

wok.

Em i stap aninit long Divain Wod Yunivesitilong Madang na em iwanpela skul i gat tok orait bilong Nesenel Trening Kaunsil long givim trening.

Ol meri sumatin bilong DBTI i amamas long kisim ol leptop long ExxonMobil.



Ol sumatin wantaim ol Sista bilong Mary Our Help i amamas long wantaim Peter Graham, MD bilong EMPNG.

WANPELA bikmeri bilong kantri, em Ledi Regina Kilage i dai pinis.

Ledil Regina Kilageem meri bilong let Sir Ignatius Kilage, namba 4 Gavana Jeneral bilong Papua Niugini.

Em i bin dai long Trinde 24 Septemba, bihain long em i bin kisim wanpela hat atek na ol i putim em long wanpela haus sik long Cairns, Australia.

Mama I karim let Regina Kilage long yia 1954. Mama bilong em Maria na papa em Paul Nime. Papa bilong let Ledi Kilage em i wanpela strongpela LLG Wod Kaunsila i stap winim 40 yia.

Regina i bin maritim Let Sir Ignatius Kilage long 1974 taim em i bin gat 18 krismas tasol bihain long em i bin pinisim Gret 10 long Kerowagi Hai Skul.

Bihain long tupela i maritim long

Goroka, em i bin stap gutpela meri, patna na wanwok bilong man bilong en long taim Let Sir Kilage i bin mekim kain kain wok bilong gavman olsem, Ekting Edministreta bilong Simbu Provins Gavman, Komisina bilong Boi Skaut Asosiesen, Komisina bilong Pablik Sevis, Sif Ombudsmen na dairekta long planti bod bilong ol praivet na pablik seka inap em i bin

kisim wok bilong en olsem namba 4 Gavana Jeneral

Bihain long man bilong em i dai long 1989, Ledi Regina i bin lukautim 4-pela pikinini bilong en wantaim ol bubu bilong em olsem wanpela singel mama inap long 24 yia na em i bungim sik na dai.

Em i kamap wanpela gutpela piksa bilong wok marimari long komyuniti na sevis long Simbu Provins na Papua Niugini.

LEDI Regina Kilage i dai

Bisop Arnold stap long Rom famili sinod

Veronica Hatutasi i raitim

LONG wol yumi stap long en tude, ol kaikain hevi i wok long bungim wanwan long yumi, famili, komyuniti na kantri.

Famili yunit em i faundersen we yumi olgeta pipel long wol i painim sefti, sekyuriti, laik pasin na ples we yumi kisim helpim taim ol narapela eria i pasim ol dua bilong ol long yumi.

Tasol long kain stap yumi stap long wol tude we teknoloji na ol samting bilong graun i winim yumi, famili i wok long bungim bikpela salens.

Olsem na Katolik Sios i gat wari na bikpela lukluk long marit na famili laip na long dispela wik, wanpela bikpela bung o "synod" long famili i kamap long Rom we PNG i gat man i makim kantri long hap.

Bisop Arnold Orowae bilong Wabag Daiosis, Enga



BISOP ARNOLD OROWAE: Bisop i toktok long ol nius manmeri bipo em i go long Rom. Poto: Pater Giorgio Licini, *The Catholic Reporter*

Provins husat tu i Presiden bilong Konpres bilong ol Katolik Bisop bilong PNG na Solomon Ailan (CBC-PNG/SI) i makim maus bilong Katolik Sios long PNG

na SI long dispela Famili Sinod long Rom.

Sampela ol arapela samting we dispela sinod bilong famili bai lukluk long ol em ol Sakramen, Poligami (wanpela man i gat planti meri) na kontrasepsen o ol rot bilong pasim bel long no ken karim pikinini.

Bipo Bisop Arnold i lusim PNG long las wik Fonde, em bin holim wanpela bung wantaim ol nius manmeri long Mosbi.

Bisop Arnold i tok hetman bilong Katolik Sios long wol, Pop Francis, yet i bin singautim tupela bung long toktok long famili na dispela em i go long en en namba wan. Narapela bai kamap long neks yia.

Em i tok dispela bung i bilong helpim Katolik Sios i wok klostu wantaim famili laip na komyuniti na tu, long serim bilip wantaim.

"Yumi mas toktok long ol eria we famili i no strong, i

bungim hevi na long wankain taim, famili long Melanesia i narakain we i no lukluk tasol long "Nuclear" o liklik famili yunit i gat long en papa, mama na ol pikinini, nogat. Long Melanesia, famili i karamapim nuklia famili na ol hauslain wantaim, na i go moa.

"Pipel i pilim olsem Sios i stap longwe long ol na ol i no inap go insait long laip bilong sios na ol sakramen. yumi mas gat rot we i mekim isi ol samting na ol kain hevi i stap, na spirituel wokabout bilong wan wan," Bisop Arnold i tok.

Em i tok long sinod, em bai mekim klia "nuklia famili" em liklik famili i gat papa, mama na ol pikinini tasol, we ol waitman na kalsa bilong ol i gat.

Em i tok long ol narapela hap bilong wol na Melanesia we PNG i stap insait long en, famili em i narakain

bikos em i gat liklik famili, ol hauslain na ol wanpisin.

"Ol i gat wok long famili na ol i amamas o karim pen taim marit insait long famili i stap long hevi.

"Long sampela sosaiti long Melanesia we ol i bihainim sait bilong mama (matrilineal), wok bilong skulim ol pikinini na welfea bilong ol i kam aninit long ol ankel o kandere bilong ol, na i no wantaim papa bilong ol pikinini," Bisop Arnold i tok.

Long bekim askim bilong poligami, Bisop Arnold i tok "dispela pasin i egensim Kristen velyu na i mas gat wok na rot long stretim ol dispela samting i stap long sosel na tumbuna pasin.

Bisop Arnold i tok tu olsem ol hevi na birua long wanpisin pait, ol naturel disasta na ol sik birua i kilim dai ol man i ken kamapim kain sindaun we i gat wanpela o liklik lain man na

planti meri na pikinini, na pasin poligami i kamap.

Long sait bilong famili plening, Bisop Arnold i tok Sios i sanap strong long "natural" rot na i no ol marasin o sut samting.

Famili Apostulet ektivis i lukautim opis bilong Katolik Famili Laip opis em John na Lucy Lavu i tok naturel ro long famili plening we Katolik Sios i strongim i wok gut long ol marit i gat komitmen na laik long bihainim dispela rot.

Misis Lavu i tok ol strongpela kempein long ol mama na ol yangepla meri long yusim ol marasin na sut long pasim bel i no save mekim klia o karimaut gutpela awenes wok long ol na ol patna bilong ol long ol kikkbek na hevi ol inap bungim taim ol i yusim o kisim ol dispela samting.

Em i tok sampela i save go long ol, tasol bagarap i kamap pinis.

Ol peris i mas gat ol famili "core" grup

EM i bikpela samting long sanapim ol "famili core groups" insait long ol Katolik peris long kantri, John Lavu na meri bilong em, Lucy i tok.

Tupela marit i lukautim Katolik Famili Laip Apostulet na opis i stap long Hohola, wankain hap we Jubili Katolik Sekenderi skul i stap long en.

Lucy i tok aninit long Misin na Visen bilong Famili Laip Apostulet, olgeta daiosis i mas sanapim ol "famili core grup" na ol i ken wok long mekim wok evanjelaisesen, kisim ol mesej o toktok i go long ol famili na tu, bringim

Krais i go insait long ol famili.

Em i tok Apostulet na ol famili core grup i gat bikpela wok insait long peris, komyuniti na daiosis long daunim vailens insait long family, ol drag, "peer influence" o bihainim ol samting we ol narapela poroman i wokim bai givim ol hevi i go long ol.

Lucy i tok wok evanjelaisesen i no min tasol olsem toktok long Gospel mesej, no gat. Ol i toktok tu long kamapim gutpela sindaun insait long ol famili bikos tude, planti hevi long sosel, ikonmik, spirituel na fisikell

i karamapim ol famili.

Em i tok tu olsem planti marit lain tude i no save toktok gut long wanpela narapela na olsem, ol i bungim hevi. Na ol i mas kisim kaunseling.

Em i tok i gat nid long trenim ol speselis long lukluk long ol hevi ol famili na pipel i bungim tude na wanpela long ol em famili plening.

Em i tok tupela i save go long ol skul we ol i askim ol long en na toktok long ol sumatin.

Ol i save lukim na helpim planti marit i go long opis bilong ol na redim ol tu long marit bilong ol.

Akernamfo Luteran pasto i kisim blesing

Paulus Tali i raitim

AKERNAMFO Luteran kongregesen insait long Rihona Paris long Kainantu nau i gat nupela pasto.

Em long Pasto Pumai Madawasa.

Pasto Madawasa i bin greduet long Ogelbeng Luteran Hailans Seminari.

Em i hapkas Samarai na Jiwaka na em marit i go long Siassi Distrik, na em i kam long ELC Papua Distrik.

Em i bin kisim blesing long bikples Brinumfi we moa Kristen long kongregesen i stap nap les we em bai mekim wok long en.

Ol narapela peris tu i bin kamap long witnesim blesing bilong pasta ya.

Gutnius Seketeri bilong Kainantu Luteran Sios, Pasto Kefi Kofi, i bin makim distrik long witnesim program na em i amamas long ol Kristen i kam aut na tok sori long wanem pasin ol i bin mekim long harim tok bilong giaman man na givim mani bilong ol.

Pasto Romana Neni i bin autim tok bilong God long stori bilong Noah husat mekim bikpela sip na kisim ol lain bilong em wantaim ol animel i go insait long sip, abrusim dispela taim bikpela tait bilong wara na inap ol i lus, tasol long God, ol i stap gut.

Pasta Neni i bin salensim ol Kristen bilong Rihona olsem na tok maski yumi i bungim ol kain kain hevi, God bai no nap lusim yumi. Em bikpela bai was long yumi.

Olsem na yumi Kristen mas save olsem sori bilong God bai no nap lusim yumi, tasol em bai em stap wantaim yumi oltaim.



AUTIM TOK: Reveren Mathias Prenzler, wanpela Luteran Pasto i autim tok long wanpela biked bilong sios. Poto: Paulus Tali



FAMILI LAIP APOSTULET: John na Lucy Lavu long bung wantaim ol niuslan las wik Fraide. Poto: Pater Giorgio Licini

Ol komyuniti i mas sanap wantaim gavman na stopim sik TB

Sik TB i kamap bikpela tru long kantri nau na gavman i wok long tok save long ol pipel i mas was na stopim dispela sik. Praim Minista, Peter O'Neill i go pas long tok save long ol pipel long redio, televisen na long ol niuspepa. Em i tok ol pipel i mas lukautim ol yet na sapos ol i pilim sik, orait kamap hariap long haus sik na lukim ol dokta. I gat marasin bilong stapim dispela sik.

Sapos yu go long pablik haus sik bai i no gat pe long dokta i sekap long yu na marasin tu i fri. Tasol sikman i mas bihainim stret toktok bilong dokta o nes na kism marasin inap long taim ol i makim. Planti sikman na meri i save bikhet na i no pinisim tritmen bilong ol.

Sapos ol i no pinisim marasin, bai TB i ken senis na kamap strong tru we i no gat marasin bilong stopim na inap long kilim sikman.

Dispela sik i kamap bikpela nau long NCD, Galp na Westen Provins na Mista O'Neill i askim ol tripela gavana long bung long dispela wik na painim rot bilong stopim sik i kamap bikpela moa. Helt Minista Michael Malabag bai go pas long dispela miting wantaim ol gavana.

Ripot i tok i gat moa pipel long NCD i gat sik TB i winim ol arapela provins. Long kirap bilong yia 2013, i bin gat 123 pipel i kism strongpela sik TB ol i kolim malti drag resistens strain (MDR) we 47 i wok long kism marasin nau, sevenpela i dai pinis na 45 i go hait na i no go bek kism marasin.

Ol dokta i tokaut pinis olsem TB i kamap bikpela long PNG bikos



planti ol sikman na meri i no pinisim tritmen bilong ol.

TB i ken kalap i go long ol arapela bikos planti famili i save stap long wanpela haus na ol i no

lukautim gut bodi bilong ol. Haus i mas gat windo we in i ken raun gut.

Na ol lain i kus i no save karamapim maus olsem na i isi

na lukim olsem sikman i wok long dring marasin, orait komyuniti i mas sapotim.

Ol skul tu i mas stap insait long dispela bipela program long NCD.

long TB jerm i kalap i go long ol narapela manmeri.

Gavman i wari long dispela bikpela hevi bilong helt na i kirapim pinis imejensi plen bilong stopim dispela sik. Gavman i skelim moa K1.236 milien bilong stapim wok long NCD.

Ol lain bilong helt dipatmen yet, ol politisen na ol arapela grup long komyuniti bai stap insait long program bilong stapim sik TB.

Bikpela luksave bilong stopim sik TB i kam long gavman nau. Orait wan wan famili i mas skulim ol pikinini na husat ol arapela lain i stap wantaim ol long dispela sik. Sapos i gat ol sikmanmeri i stap, orait hariap long go sekap long haus sik.

Sapos i gat program bilong sekap

Planti skul i gat moa long 60 studen long wanpela klas na i no gat spes bilong ol pikinini i sindaun gut. Dispela kain envairomen i isi tru long kain sik olsem TB i kalap hariap. Tisa i mas skulim ol pikinini long karamapim maus long taim ol i kus.

Sapos pikinini i kus oltaim, salim pas long papamama i mas kism em i go sekap long haus sik. Dispela em sampela liklik rot we komyuniti tu i ken stapim sik TB.

Pret na wari bilong stopim dispela sik ating bai opim tu ai na yau bilong ol politisen long lukluk long helpim ol famili i painim gutpela haus.

Planti moa manmeri long Mosbi i stap long ol setelmen o i rentim ol liklik rum we i no gat inap windo long win i raun na klaim ples.

I gutpela sapos ol helt opisa i sekap long ol dispela kain ples bilong rent na givim toklukaut long papa bilong flet. Planti bilong ol i tinging long wokim profit na i no wari long helt bilong husat man o meri i rentim rum.

Tok save bilong stopim sik TB i kamap pinis. Olgeta manmeri husat i ritim stori long niuspepa o harim long TV na redio i luksave long wanem bikpela moa hevi bai kamap sapos yumi no bung wantaim gavman na stopim TB.

Gavman i putim mani na ol dokta na nes i sambai long helpim sikmanmeri.

Tasol yumi long komyuniti yet i mas sanap strong na rausim dispela sik insait long famili na haus lain bilong yumi tu.

Stretim gut rot bilong kism graun

PLANTI komplek na kros i kamap pinis long pasin bilong kism graun insait long ol taun na siti we opis bilong Lens Dipatment i save givim aut taitel long ol lain.

Long dispela wik, planti komplek na kros i kamap long ol graun insait long Lae siti we ol bisnis lain na kampani wok long kism. Ol dispela graun em bipo yumi save olsem em graun bilong ol asples, graun bilong gavman na graun bilong skul.

Long Mildford Heaven skul long Papua Kompaun, sampela lain i laik kism dispela bikpela pilai graun we bipo yet yumi save pilai skul spot na planti bikpela pilai na kalsarel singsing i save kamap long en. Mipela save ting olsem em graun bilong gavman we skul i sanap long en long yusim.

Ating planti manmeri husat i lapun na bikpela long Papuan Kompaun i save gut long dispela graun na ol bin komplek na askim gavman long tok klia long wanem kain



rot na as sampela lain laik kism dispela graun olsem praivet graun bilong ol nau.

Ol papagraun bilong Ahi long Lae i mekim wanpela bikpela straik tu egensim Morobe Provinsel Edministresen olsem ol wok long hait na salim graun bilong ol long ol ausait lain na ol bisnis lain insait long Lae siti.

Dispela i kamapim planti kros nau long pasin bilong kism graun insait long ol na siti long Lae na long Mosbi na arapela senta tu. Ating wok tru bilong skelim na givim aut graun i save kam long opis bilong Lens Dipatmen long Mosbi na ol Provinsel Lens Opis bilong em. Sapos ol i no mekim samting stret bihain lo na rot bilong givim aut graun em nau bai yumi lukim kain pairap na bikmaus i kamap.

Olsem wanem sapos Lens Dipatmen ken putim aut ples klia ol graun em laik salim long bikpela pablik notis o toksave long niuspepa. Putim open toksave o tenda olsem dispela hap graun nau i stap long maket na yu husat laik baim orait aplai na traim long kism. Ating bai kain ripot olsem i kamap klia na husat i gat toktok o komplek bai kamaut na toktok pastaim na yumi harim na skelim.

Sapos em i graun bilong gavman, orait gavman i gat rait long salim olsem na em mas putim long open maket o tenda na ol bisnis lain na kampani ken aplai long kism.

Em wanem kain pasin long pasim tok long sait tasol na ol lain wantaim mani kam isi tasol go insait long Lens pis na mekim pepa wok na kism taitol isi tasol na kam go aut.?. em yumi ken tok pasin bilong stil o paulim samting bilong narapela man.

Mekim samting ples klia bai olgeta pipel na pablik ken save olsem em samting bi-

long gavman na gavman gat rait long salim. Sapos em kastomari graun orait, ol papagraun bai kam aut klia na toktok na stopim.

Ol wokman bilong gavman mas pret tu long kism sait mani o hait mani bilong ol bisnis lain long mekim kain hait pasin olsem long givim graun na taitel go aut long sait sait. Tingim, graun em bikpela samting na ol tumbuna save pait long kism graun. Dispela pasin bilong pait long graun em stap yet bikos yumi save olsem graun em strong na laip bilong yumi.

Papua Niugini em yumi olgeta i papagraun. Yumi gat graun bilong yumi stret we ol papa na tumbuna givim long yumi.

Dispela em mekim yumi PNG i narakain long planti arapela kantri we ol pipel nogat graun. Em graun bilong gavman na gavman go pas long kontrolim na ol pipel stap tasol na bihainim.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Pe bilong wanpela yia Websait: www.wantokniuspepa.com Pe bilong wanpela yia, 52 niuspepa

PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

NAMBA 14 bung bilong ol meri Luteran i kamap long Boana stesen long las mun na i bin pinis gut

Dispela em i wanpela bikpela bung bilong ol meri insait long 17-pela distrik bilong Evangelikel Luteran Sios bilong Papua Niugini (ELCPNG).

Dispela bung i bringim ol meri Luteran insait long kantri na tu, ol ovasis sios patna olsem Australia, long dispela bung. Ol sampela narapela ol meri lida i bin kam bung long dispela taim tu.

Praim Minista Peter O'Neill, husat i wanpela Luteran Sios memba na i bilong Emmanuel Distrik long laibu, long Sauten Hailens i bin kam long opim dispela bung.

Long taim bilong opim bung, Mista O'Neill i tok wok bilong ol meri insait long sios na kantri i gat bikpela luksave long wanem, em i bilong kamapim gutpela famili long kirapim na kamapim ples.

Taim em i kisim dispela 5-yia-plan bilong ol meri Luteran, Mista O'Neill i tok gavman i gat bikpela tingting long luksave long ol meri olsem ol lain bai kamapim kantri na gavman i laik helpim ol long dispela.

Em i tok aninit long dispela sios patnasip program, ol i laik helpim ol sios na mekim wok na ino laik long sindaun nating.

"Mi laik toksave long yupela ol meri olsem dispela Nesenel gavman i laik wok bung wantaim ol meri na long dispela 5-yia plan, em bai ol i lukluk na kamap wantaim sampela tingting long helpim ol.

"Planti taim ol i save toktok nating na i no save mekim samting.

Tasol nau, ol i no laik mekim toktok nating na i laik mekim sampela samting. Ol i no laik sindaun nating," Mista O'Neill i mekim dispela toktok long opening bilong Konprens.

Em i tok planti taim ol save toktok long sios patnasip, tasol i no save wok. Dispela gavman i gat bikpela luksave long sios na i laik wok klostu wantaim ol.

Praim Minista i tok bihain tasol long ol pinis long ileksen, ol i helpim wok bilong ol sios long save na long risos. Na dispela wok bung wantaim bai stap i go het na gavman bai sapotim.

Wankain taim tu, ol i bin kamapim dispela bung bilong ol meri insait long kantri long helpim ol meri na ol mas putim planti mani na kisim planti mani tu. Benk save gro taim ol i putim mani i go insait.

Praim Minista i tok dispela wok bilong helpim ol meri long kisim sampela kain luksave mas stap na dispela tu bai strongim ikonomi bilong kantri.

Long wankain taim tu, em i givim K200, 000 i go long ol meri husat i go pas long kamapim dispela bung.

Naru amamas long PM long sios patnasip program Morobe Gavana Kasiga Kelly Naru i tok bikpela amamas long Praim Minista Peter O'Neill long gavman i wok bung wantaim ol sios long kamapim kantri.

Mista Naru i tok Morobe Provinsel Gavman em wanpela provins insait long kantri i kamapim dispela program na nau em i lukim nesenel gavman i mekim wankain wok long dispela sios patnasip program.

Em i tok planti taim ol i lus tingting long wok bilong sios tasol dispela gavman (Morobe na Nesenel) i luksave long strong bilong ol sios na laik wok bung wantaim ol. Dispela em wanpela bikpela we bilong kirapim ples na kantri.

Naru i tok gavman bilong em yet i bin mekim dispela wok tupela yia i go pinis na

lukim planti senis bilong ol dispela hanmak. Na dispela program em bai go het yet.

"Insait long tupela yia, mipela i yusim olsem K10.5 milien. K5 milien long las yia na narapela K5.5 milien long dispela yia long wok bilong God. Dispela em mani mipela i tromoim long wok bilong God," em i mekim dispela toktok long namba 14 bung bilong ol mama Luteran long Boana long las wik Sande.

Naru long dispela taim tu, i presenim dispela 5-yia plan bilong ol meri Luteran igo long praime minista husat i bin go kamap long bung.

Em i tok ol i tingting tru long dispela wok bilong sios na lukim planti samting i kamap long Lae siti. Dispela em K700 milien intanesenel si bris, K200 milien bilong Lae siti rot na K1 bilien bilong stretim gut Angau Hausik. Dispela haus sik em gavman bilong Papua Niugini na Australia i bungim mani wantaim.

Em i tok dispela em blesing bilong K10.5 milien we ol i yusim long lukim ol bikpela mani wok i kamap insait long provins bilong ol.

Na em i tok tenk yu tu long Praim Minista long lonsim dispela nupela sios patnasip wantaim gavman i no long-taim i go pinis.


Ol Luteran meri insait long 17-pela distrik bilong Evangelikel Luteran Sios bilong Papua Niugini i bung long kol ples Boana long Nawaeb distrik bilong Morobe.

Ol narapela meri long ovasis tu i kam bung long dispela bung.

Dispela plen buk em i gat bikpela tingting bilong wok bilong ol mama bilong Luteran insait long sios na wok polisi bilong stiam ol meri long kamapim gutpela sindaun, insait long famili, Kristen laip na wok developmen



PRISENIM PLEN: Naru i presenim 5-yia-plen bilong ol Luteran meri i go long Praim Minista, Peter O'Neill.



Bustin Anzu i raitim

Praim Minista Peter O'Neill i mekim sampela toktok long bung.



OL LIDA: (l-r) Olpela Memba bilong Nawaeb Kennedy Wenge, Gavana Kelly Naru na Praim Minista Peter O'Neill i sanap na lukluk long pisin danis bilong ol Wain long Boana.



DANIS BILONG BOANA: Pisin danis bilong ol lain Wain bilong Boana, we ol i kamapim long Boana long taim bilong opening bilong konprens.



Sampela bilong ol dispela meri i bung long Boana gavman stesen long namba 14 Nesenel Luteran Meri Konprens.



Program bilong Wanwan De

De - Mande - Fraide

6am - 10am - Sankamap show - Host: Kas.T
 6:00am - Major Nius Bulletin
 6:15am - Komuniti Notis Bod
 6:25am - Taim Bifo - wanpela singsing blong bifo.
 6:30am - Nius Hetlains
 6:45am - Bonde grins
 7:00am - Major Nius Bulletin - YUMIFM Nius Senta
 7:05am - YU TOK - komiuniti awenes program
 7:15am - WAN 4 DA ROAD - Hit Prediction - niupela singsing
 7:30am - Tok Pilai - stori blong putim smail long nus pes.
 8:00am - Major Nius Bulletin - YUMIFM Nius Senta
 8:05am - YU TOK - komiuniti awenes program
 8:15am - "Papa Heni Fuka Show".
 9:00am - Nius Bulletin - YUMIFM Nius Senta
 9:15am - Luksave long Komuniti (Redio Pilai) Fraidei

Tasol
 9:30am - Final aua cruz
 10am - 3pm - Morin Trek na Belo Pack - Host: Mummy DASH
 10:00am - Major Nius Bulletin - YUMIFM Nius Senta
 10:05am - YU TOK - komiuniti awenes program
 10:15am - Kona blong yu.
 10:45am - YUMI PANIM WOK Segment
 11:00am - Nius - YUMIFM Nius Senta
 11:05am - YU TOK - komiuniti awenes program
 11:10am - Lukautim yu yet - Helt toktok
 11:30am - Nius Hetlains blong Belo Taim - Laik blong yu - Niupela singsing previu
 12:00pm - Major Nius Bulletin - YUMIFM Nius Senta
 12:05pm - YU TOK - komiuniti awenes program
 12:10pm - BELO Pack - Belo taim rekwes na dedikesen
 12:15pm - Komuniti Notis Bod
 12:20pm - BELO Pack - Belo taim rekwes na dedikesen
 1:00pm - Nius - YUMIFM Nius Senta
 1:05pm - YU TOK - komiuniti awenes program
 1:10pm - BELO Pack - Belo taim rekwes na dedikesen

2:00pm - Major Nius Bulletin - YUMIFM Nius
 2:05pm - YU TOK - komiuniti awenes program
 2:45pm - YUMI PANIM WOK Segment
 3pm - 7pm - Avinun Draiv Taim - Host: Vaviessie
 3:00pm - Nius - YUMIFM Nius Senta
 3:05pm - YU TOK - komiuniti awenes program
 4:00pm - Nius - YUMIFM Senta
 4:05pm - YU TOK - komiuniti awenes program
 4:10pm - FOAPELA KAM GUD LONG 4 - foapela singsing
 4:30pm - Nius Hetlains
 4:45pm - YUMI PANIM WOK Segment
 5:00pm - Major Nius Hetlains - YUMIFM Nius Senta
 5:05pm - YU TOK - komiuniti awenes program
 5:10pm - 6:00pm - KULCHA Musik (1 hr) skelim lokal musik 6pm - 7pm
 - NAIT BEAT - Host: Vaviessie
 6:00pm - MAJOR NIUS BULLETIN - YUMIFM NIUS SENTA
 6:05pm - YU TOK - komiuniti awenes program

6:10pm - 7:00pm Mon kamap sho
 6:45pm - Komuniti Notis Bod
 7:00pm - COCA COLA GARAMUT - Host: Angra Kennedy
 7:00pm - Nius - YUMIFM NIUS SENTA
 7:05pm - YU TOK - komiuniti awenes program
 9:00pm - 00am - Nait Beat - Isi Cruz long nait
 00am - 6am - BRUKIM TULAIT SHOW - Host: Tuluvan Vitz/Talaigu Sopi/Bata Cruz
 00:00 - Early Monin Taim Cruz (ol lain brukim tulait shift)
 - Musik / Request / Tok pilai
 - Kipim Kampani long ol nait shift.
Wikens - Sarere
 6am - 10:00am - Wiken Sanrais Host: Talaigu Sopi
 7am - 9am - Sarere Monin Cruz
 9am - 11am - Monin Treks
 11am - 1pm - National Weekly Hit Parade - Host: Kasty - 1st aua NWHP
 12:00pm Nius - YUMIFM Nius Senta
 12pm - 1pm - 2nd aua NWHP

Sarere belo cruz - Host: Tuluvan Vitz
 1pm - 2pm - Sarere Belo Taim Dedikesen
 2:00pm Nius - YUMIFM Nius Senta
 2pm - 6pm - Sarere Avinun Cruz
 6:00pm Nius - YUMIFM Nius Senta
 6pm - 00:00am - Nait beat
 7pm - 9pm - Coca Cola Garamut
 9pm - 00:00am - Nait cruz
 00:00am - 6am - Brukim Tulait Show
 Wiken - Sandei
 6am - 10am - Wiken Sanrais / Sandei Monin wokabout Musik
 10am - 12noon - Monin Treks
 12noon Nius - YUMIFM Nius Senta
 12 - 2pm - Sandei Belo Taim Music
 2:00pm Nius - YUMIFM Nius Senta
 2pm - 6pm - Sandei Avinun Draiv Music
 6pm - Nius - YUMIFM Nius Senta
 6pm - 8pm - GOSPEL REKWES AUA
 8pm - 00:00am - Late Nait Cruz - Poroman Aua
 00:00am - 6am - Brukim Tulait Show
Program Director - YUMIFM - Kasty

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Spots
 7.30PM Nius na Karen Afecas
 8PM Helt
 8.15PM Musik
 8.30PM NIUS
 8.40PM Spots Riplei
 8.55PM Musik
 9PM Stesen Pas

TUNDE - Moring - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Mama Graun
 8.15PM Musik/Spots
 8.30PM NIUS
 8.40PM Helt Riplei
 8.55PM Musik
 9PM Stesen Pas

TRINDE - Moring - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Focus
 8.15PM Musik/Spots
 8.30PM NIUS
 8.40PM Mama Graun Riplei
 8.55PM Musik
 9PM Stesen Pas

FONDE - Moring - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Youth
 8.15PM Musik/Spots
 8.30PM NIUS
 8.40PM Focus Riplei
 8.55PM Musik
 9PM Stesen Pas

FRAIDE - Moring - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afecas
 8PM Wantok
 8.15PM Musik
 8.30PM NIUS
 8.40PM Youth Riplei
 8.55PM Musik
 9PM Stesen Pas

SARERE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Wantok
 8PM Lokal Ben
 8.30PM Nius
 8.40PM Musik/Chit Chat
 9PM Stesen Pas

SANDE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Femili Blong Serah (Redio Plei)
 8PM Lukluk Bek Long Wik
 8.30PM Nius
 8.40PM Musik/Chit Chat
 9PM Stesen Pas

Raun wantaim Wantok kru ...

Raikos 'mango buai' soim pes nau

James G. Kila i raitim

WANPELA kain buai planti lain long Madang i save kolim 'Raikos mango buai' nau i wok long soim pes nau long ol rurel maket long Raikos distrik long Madang bikos taim bilong buai stret i wok long sot nau.

Long Basamuk eria long Raikos distrik ol mama long ples i wok long karim ol 'mango buai' blong Raikos na salim long ol wokman bilong Basamuk Rifaineri.

Planti ol wokman i save pasim tingting tasol na baim buai ya taim ol i no lukim pes bilong buai stret ol mama i salim. Ol mama blong Dein viles na ol arapela arere long Yaganon riva i save go maket olgeta moning stat long Mande i go Sarere wantaim buai na ol frut na ol arapela gaden kaikai long ol Ramu NiCo Basamuk Rifaineri wok lain.

Sapos yu nupela man long go long Basamuk, bai yu mangal stret long lukim ol Raikos 'mango buai' i soim kala bilong ol long ol rot-sait maket arere long rot long Basamuk.

Dispela Raikos mango buai i gat strongpela skin, we ol lain bilong kaikai i save yusim naip long rausim skin. Mit bilong dispela buai em bikpela ya yu ken kaikai liklik liklik olsem foapela taim.

Raikos 'mango buai' em 50-toea tasol long ol maket long Basamuk na planti lain save baim na karim i go long haus na mekim save long en long nait. Ol lain i save laikim mango buai blong Raikos i save katim i go foepela hap na kaikai liklik liklik wantaim daka. Dispela em bikos sapos ol i laik kaikai olgeta buai maus long ol bai solap narakain stret ya.

Buai ya i narakain moa long buai bilong Bogenvil na tu ol arapela eria. Skin bilong en i strong na sampela i save faol na ting em wail buai, tasol em trupela 'mango buai bilong Raikos stret.



Wanpela mama i salim Raikos 'mango buai' long Marmar maket arere long Basamuk taunsip bilong Ramu NiCo long Basamuk. *Poto: James G. Kila*

EMTV Television Guide

FONDE OKTOBA 09, 2014

8:40 PMG **HOT SPOT Ep#33**
 9:10 PM PG **ELITE MUSIC ZONE #31**
 9:40 PM G **NEWS REPLAY**
followed by the Australia Network

SLEEPOVER CLUB S1 EP#11/26
 SHAK S6 EP#1/40
 5:30 PM G **SKIPPY - Puppets**
 5:55 PM G **CRIME STOPPERS**
 6:00 PM G **EMTV NATIONAL NEWS**
 7:00 PM G **IN MORESBY TONIGHT -**
 7:30 PM PG **ALERT THREATENED SPECIES**
 8:30 PM MA **FRIDAY NIGHT MOVIE**
 10:00PM G **EMTV NEWS REPLAY**
followed by the Australia Network

7:30 AM G **AUSTRALIA NETWORK**
 8:30 AM G **SKILLICIOUS S2 EP#7/7**
 9:00 AM G **DANI'S HOUSE S2 EP#2/12**
 9:30 AM G **ULTIMATE GUINNESS WORLD RECORDS - EP#31/52**
 10:00 AM G **PACIFIC WAY EP#16 - Rpt.**
 10:30 AM G **SKIPPY- Puppets - Rpt.**
 11:00 AM G **AUSTRALIA NETWORK**
 5:30 PM G **OLSEM WANEM EP#39**
 6:00 PM G **EMTV NATIONAL NEWS**
 6:30 PM G **SECRET MILLIONAIRE USA -**
 7:30 PM G **RAIT MUSIK repeat**
 8:30 PM MA **MOVIE - RISKY BUSINESS**
 10:00 PM G **EMTV NEWS REPLAY**
followed by the Australia Network

3:30 AM G **AUSTRALIA NETWORK**
 6:30 AM G **EMTV NEWS REPLAY**
 7:00 AM G **HILLSONG**
 7:30 AM G **AUSTRALIA NETWORK**
 9:00 AM G **BUSINESS PNG YR.3 EP#38 rpt.**
 9:30 AM G **AMAZING SPIES Ep #4**
 10:00 AM G **OLSEM WANEM EP#39- RPT**
 10:30 AM G **RESOURCE PNG EP#37 - Rpt**
 11:00 AM G **ITALIAN KHANNA Ep #2**
 11:30 AM G **ITALIAN KHANNA Ep #3**
 12:00 PMG **AUSTRALIA NETWORK**
 5:30 PM G **LOVE PATROL S6 Ep #02**
 6:00 PM G **EMTV NATIONAL NEWS**

FRAIDE OKTOBA 10, 2014

4:00 AM G **AUSTRALIA NETWORK**
 5:00 AM G **JOYCE MEYER 1099-5**
 5:30 AM G **EMTV NEWS REPLAY**
 6:30 AM G **TODAY**
 09:00 am G **CLASSROOM BROADCASTS**
 3:30PM G **KIDS KONA**
 HI 5 S12 EP#38/39
 NEW MACDONALD'S EP#51/52

SARERE OKTOBA 11, 2014

4:30 AM G **AUSTRALIA NETWORK**
 6:00 AM G **EMTV NEWS REPLAY**
 7:00 AM G **IN HIS STEPS EP#33**

SANDE OKTOBA 12, 2014

6:30 PM G **VOCAL FUSION S1 - Ep#11**
 7:30 PM G **TOK PIKSA - EP#2014/44**

4:30 AM G **AUSTRALIAN NETWORK**
 5:00 AM G **JOYCE MEYER 1099-4**
 5:30 AM G **EMTV NEWS REPLAY**
 6:30 AM G **TODAY**
CLASSROOM BROADCASTS
KIDS KONA
 HI 5 S12 EP#37/39
 NEW MACDONALD'S EP#50/52
 SLEEPOVER CLUB S1 EP#10/26
 SHAK S5 EP#33/33
 5:30 PM G **PACIFIC WAY EP#16**
 6:00 PM G **EMTV NATIONAL NEWS**
 7:00 PM G **RAIT MUSIK EP#232**
 8:00 PMG **RESOURCE PNG Ep#37**
 8:30 PM G **SOKA XTRA EP#31**

TORO



BIABIA



KANAGE



KROSWOD

- A list of crossword puzzle clues in Indonesian, numbered 1 through 53. The clues include words like 'Antap', 'Rot em ges bilong LNG', 'Grasnai', etc.

SUDOKU

A 9x9 Sudoku grid with numbers 1-9 in various positions, representing a completed puzzle.

Ansa bilong las wik Sudoku # 64

A 9x9 Sudoku grid with some numbers filled in, representing a puzzle to be solved.

Ansa bilong Sudoku # 65 neks isu

A crossword puzzle grid with some letters filled in, representing a puzzle to be solved.

Ansa bilong las wik krowod, isu # 2091

A crossword puzzle grid with some numbers filled in, representing a puzzle to be solved.

EMTV Television Guide

A detailed television schedule table for EMTV, listing programs, times, and dates for October 6, 7, and 8, 2014. It includes categories like 'Today', 'Tunde Okto 07, 2014', and 'Trinde Okto 08, 2014'.

Oi Progam na Kilok i ken senis oltaim...

Oi Raun Nabaut Poto:

Raun wantaim Kanage olgeta wik



NAISWAN: Lorengau Taun Maket long Manus Provins i gat ol naispela kaikai bilong solwara olsem pis, ol kulau olsem ol dispela naispela na switpela grinpela kulau we mama i salim i stap, na ol arapela gaden kaikai na abus bilong solwara.



KOROBA KOPIAGO KISIM EM TV: Oi pipel bilong Koroba-Kopiago long Hela Provins nau i ken harim ol feveret program bilong ol long EM TV long Edvans VSAT teknologi bilong Telikom. Olsem piksa i soim, Palamen Mema, Philip Undialu i bin go pas long lonsim EMTV signal long las wik. Nau tu, pipel long hap inap long kisim ol sevis olsem koneksen bilong telipon na intanet i go long ol skul, helt senta na ol arapela gavman bodi na ol liklik bisnis wantaim wol. Poto: Telikom PNG



PNG LNG SAPOTIM: Kampani i papa long bikpela ges projek long kanti, em, PNG LNG Projek i luksave olsem kalsa na tumbuna pasin bilong PNG em i bikpela samting. Olsem na em i bin sponsaim namba 4 Kutubu Kundu na Digaso Festival long las mun wantaim K20,000. Festival i bin kamap long Kutubu, Sauten Hailans na so ya i save bungim ol pipel bilong Kutubu, Bosavi na Samberigi long kam wantaim na selebret, soim na skulim ol komyuniti olsem em i bikpela samting long lukautim ol kalsa na tumbuna pasin. So i bin stat long ya 2011 na moa long 5,000 pipel i go pinis insait long en. Poto: Exxonmobil media

Kastom mangi

WANPELA moning meri bilong Kanage laik go long maket long Dagua na em tokim Kanage, 'plis naispla man bilong mi nogat makmak bilong yu. Mi bai go long maket long salim buai bilong mi na bai yu was long liklik Vero na stap long haus. Olgeta samting mi wasim na hangamapim long lain i stap. Sapos ren i pundaun yu rausim ol klos i stap long lain. Gel tekov pinis long maket na bikpela ren i pundaun. Kanage rausim ol klos bilong em wantaim pikinini na i no rausim pens bilong misis. Apinun nau na meri bilong Kanage kam bek na lukim olsem bikpela ren stret long ples, em kam daun long PMV na rot stret long haus na lukim olsem Kanage i no rausim pens bilong em long lain. Em i belhat na bikmaus antap long Kanage, 'mekim wanem na yu no rausim pens bilong mi long lain?' na Kanage tokim em 'plis em kastom ya. Hau bai mi holim pens bilong yu?' Meri bilong em kirap na tokim em olsem, 'san na yu tok kastom, nait husat dispela masalai pukpuk save kaikaim long tit na pulim rausim?'

Kevin Penias
E S P



Yupela i no mangi moa
KANAGE i gat tupela pikinini man. Tupela wantaim i marit na stap wantaim papa na mama bilong tupela. Wanpela taim, Kanage i spak nogut tru na kamap long haus. Em singautim tupela pikinini man bilong em na meri bilong tupela i kam bung. Em nau Kanage i tokim ol olsem: 'Sori tupela pikinini bilong mi, mi laik toksave long yupela olsem em i no gutpela long yumi olgeta i stap long wanpela haus tasol. Yu tupela marit pinis na yu tupela mas wokim haus bilong yupela na stap long em nau. Mi wantaim mama bilong yupela i les pinis long harim kain kain nois bilong guria yupela save wokim long nait. Em samting bilong sem yah. Long wankain taim, em i no gutpela long yupela harim ol kain kain nois mi wantaim lapun bilong mi wokim. Yupela i no manki moa. Yupela i save olsem taim bikpela guria i kamap,

haus i save mekim nois ya. olsem em i moa gutpela long yu tupela i mas wokim haus bilong yupela yet'. Tupela pikinini man bilong Kanage em sem long toktok bilong papa bilong ol na kisim ol samting bilong ol na go stap wantaim ol tambu bilong ol.

Andrew Luh Dhai
Angoram

'About three weeks ago!'

Lapun Kanage em bilong Salamaua long Morobe Provins. Wanpela moning em i go limlimbur long Voco Poin nambis long Lae. Em lukim wanpela waitman wet i stap long kisim bot i go long Salamaua. Waitman ya i no save long hamas aua bai bot kisim long go kamap long Salamaua, olsem na em askim Kanage, "Excuse me, how long does it take to travel from Voco Point to Salamaua?" Lapun Kanage bekim, "About threeweeks ago!" Waitman ya laik lap tasol em strongim bel na askim em gen, "Sir, I am not asking about the days, but the time?" Em nau Kanage tok, "About one long wan!"

Voco Poin
Lae

Mi gat hevi na mi laikim helpim

Dia Laiplain

WANPELA hauslain famili i bin kisim mi olsem nambawan pikinini bilong ol taim mi gat tupela krismas tasol. Mama i kisim mi em i wanblut susa bilong papa tru bilong mi. Taim mi wok long groap, mi lukim olsem dispela famili i no mekim gut long mi, skelim wantaim ol pikinini stret bilong ol. Tasol mi no bisi long dispela bikos mi luksave long ol sakrifais nau papamama i mekim long putim mi i go long skul na mi pinisim skul bilong mi. Na nau mi gat wok na mi wok i stap.

Mi wok long helpim baim skul fi long ol brata na susa bilong mi go long ol teseri skul. Na taim ol samting i kamap na famili i laikim helpim wantaim mani, mi save givim long ol.

Tasol mi pilim olsem i nogat luksave long hatwok bilong mi long kontribuit na helpim famili. Na mi lukim olsem mama i save sapotim tasol ol pikinini tru bilong em, maski samting ol i mekim i no stret. Mi pilim olsem dispela i no fea o stret long mi. Tasol taim ol i laikim helpim, ol i save kam long mi.

Nau ol brata na susa i save olsem mi no pikinini stret tasol ol i kisim mi i go insait long famili bilong ol na ol i no lukluk gut long mi. Taim mipela i wok long groap, ol no bin save na i no bin mekim olsem. Nau ol i no save wokim gut long mi na mipela i no stap gut olsem famili i mas stap long en. Mi no amamas long dispela bikos mi no save bai mi lukluk i go long husat taim mi bungim wari na hevi long wanem, dispela em famili tasol mi gat na mi save gut long ol. Famili mi groap na laikim tumas i no moa wankain. Ating dispela em bikos ol i nogat ol samting we mi gat long en nau.

Tru tru papamama bilong mi i stap laip yet, tasol mi no save kontekim ol. Mi lus na mi paul long husat bai mi go long en taim mi laikim helpim.

CONFUSED CHILD

Dia Pren
Tenkyu long serim wari bilong yu wantaim mipela.
Mipela i sori long ritim pas long wari



na hevi yu wok long bungim wantaim ol adoptet famili bilong yu. Sori long tok olsem mipela i save kisim ol wankain pas olsem i kam long ol pikinini we narapela famili i kisim ol i go insait long famili bilong ol olsem yu.

Famili bilong susa bilong papa stret bilong yu i bin kisim yu olsem wanpela famili memba bilong ol taim yu gat tupela krismas. Ol i baim skul bilong yu na yu go skul, pinisim skul na nau yu wok i stap. Tasol taim yu wok long groap, yu luksave olsem nau mama i no mekim gut long yu olsem ol trupela pikinini bilong em. Em i sapotim ol taim ol i wokim rong.

Tasol yu no bisi long pasin nogut mama i mekim long yu bikos ol bin sapotim yu long skul nay u wok i stap nau. Nau ol brata na susa bilong yu i save olsem yu na ol i kamap long wanpela mama na papa na olsem, lukluk bilong ol i no wankain olsem taim yupela i wok long groap. Yu soim laik pasin bilong yu na yu helpim ol, baim ol skul fi bilong ol na taim famili i laikim helpim. Tasol ol i no givim yu luksave long sapot yu wok long givimi go long ol.

Pren, mipela i bilip i gat sampela famili na ol papamama husat i save sapotim ol pikinini na i no mekim gut long ol adoptet pikinini bilong ol. Mipela i bilip i gat sampela as tingting watpo ol i mekim olsem.

Mipela i lukim olsem maski ol i no mekim gut long yu, yu no bisi tasol bikos yu gat bikpela laik long ol, yu lukautim ol gut, baim skul fi bilong ol brata na susa na helpim ol taim ol i laikim helpim wantaim mani samting. Tasol ol i no luksave na dispela pasin i hat tru.

Pren, i moabeta yu toktok long was papamama bilong yu. Em i gutpela long autim wari bilong yu i go long ol

na toktok wantaim ol long en. i no gutpela long yu holim ol wari long bel bilong yu na wari tumas long ol. Ating ol no save long ol wari na hevi yu gat long en na taim yu toktok wantaim ol, yu bai pilim gut.

Mipela i enkarim yu long veluim yu yet na tingting gut tasol long yu yet. Sapos yu toktok wantaim tupela papamama long ol samting i no stret ol i wokim long yu, dispela bai helpim ol brata na susa bilong yu tu. Sapos yu bilip olsem pasin bilong ol i no stret, em bai gutpela long helpim ol i stretim dispela.

Pren, yu wok pinis na yu tingting tu long painim haus bilong ol singel woklain i stap long en? Dispela i ken helpim yu long i lukautim yu yet na helpim papamama wantaim ol narapela pikinini na long dispela rot tu, abrusim pasin bilong feveretisim. Tasol ol i mas larim yu i go wantaim wanel na gutpela tingting. Yu ken raun i go lukim ol yet.

Mipela i bilip olsem nogat samting i rong long kontektim trupela papamama bilong yu. i gutpela long toktok wantaim ol na sapos nau papamama bilong yu i tok orait long dispela. Yu gat sampela narapela hauslain husat yu ken serim wari bilong yu wantaim? I moabeta yu sea wantaim pipel yu trastim o ol i save gut long yu.

God i laikim yu na i laikim yu gat gutpela bihain taim. Mipela i bilip olsem ol nau papamama i laikim yu long gat gutpela bihain taim, tasol nogut ol i no save na ol i wokim pasin we ol i no bisi long yu. Kisim dispela olsem salens long muv fowed taim yu gro long tingting na laip bilong yu. God i save wanem i gutpela long yu. Ritim Romans 8:28.

Pren bilong yu, Laiplain

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laiplain



Helen Morlin wantaim pikinini meri bilong en, Bernardene Morlin. Foto: ABC

Australian Aid i mas go stret long PNG Helt

I GAT askim olsem Australia i mas givim bikpela hap long mani em i save givim long Papua New Guinea i go long stretim helt sevis long kantri.

Dispela em i askim bilong wanepela mama bilong PNG husat i lukautim pikinini meri bilong en i sik no gut long Townsville long Queensland.

Helen Morlin i mekim dispela toktok long wanem, i gat toktok olsem klostu taim, Australia bai rausim pikinini bilong em long Australia na salim em i go bek long PNG.

Pikinini bilong en, Bernadine Morlin, i bin kam long Australia long 2012 long skul tasol kidni bilong en i bin bagarap na em i stap kisim marasin na helpim long haus sik long Townsville.

Tasol nau mama bilong en i tok PNG i no gat ol gutpela masin long helpim pikinini bilong en sapos em i go bek long PNG.

Misis Morlin i tok tu olsem PNG i pulap tru long ol kain kain risos, tasol em i askim, mani em kantri i save kisim long ol dispela samting i save go we stret.

Moa Solomon Ailan woka i go wok long Nu Silan

Tupela ten ol wokman-meri bilong Solomon Ailan i redi nau long lusim kantri bilong go wok long ol fam long Nu Silan.

Deputi Dairekta bilong Tred long Solomon Ailan, Jack O'oi i tok ol dispela pipel bai joinim ol narapela wok manmeri bilong ol narapela kantri long Pacifik long wok long ol fam long Australia na Nu Silan.

Ol dispela pipel bilong Solomon Ailan i bin stap long wanpela bung long dispela wik Mande long Honiara bilong harim ol gutpela toktok i kam long Labour Mobility Unit(LMU) insait long Ministri bilong Foreign Affairs na External Trade.

Dispela miting em i bilong rediim ol long wok-about bilong ol i go long Nu Silan.

Sampela samting em ol i tokim ol dispela woka long en, em long no ken spak tumas.

Ol i mas luksave o rispektim wanpela narapela, luksave long ol loa bilong Nu Silan na tu long lukautim gut mani bilong ol.

Bogenvil i gat bikpela wari long mental

BOGENVIL Kraisis i bin mekim planti pipel i long long o hevi long tingting bilong ol.

Helen Hakena em dairekta bilong Leitana Nehan Developman Ejensi long Bogenvil i tok planti wari i wok long kamap nau long Atonomas Rijon bilong Bogenvil (ARB) long PNG olsem planti pipel i wok long bungim hevi long sik long het/tingting o mental helt, bihainim Bogenvil Kraisis.

Long dispela wik, minista bilong helt long Bogenvil, Rose Pihei i bin autim dispela wari olsem, maski peace o gutpela sindaun i stap nau long ailan long tupela ten yia, planti pipel i gat long-long long hed bilong ol.

Dispela wari bilong mental helt i wok long kamap tu long Australia we long dispela wik, o li mekim planti toktok long mental awenes wik.

Sampela NGO grup long ARB i wok long mekim planti wok long helpim ol pipel i gat wari long mental helt. Wanpela long ol dispela grup em Leitana Nehan developman ejensi long Buka.

Daireketa Hakena i tok gavman bilong Bogenvil i mas kirap nau na traim mekim sampela samting long helpim gut ol pipel i gat sik long het.

Askim long PNG long rausim loa we i tambuim ol man prenim man na meri prenim meri

I GAT strongpela askim i go long gavman bilong Papua New Guinea long rausim ol loa we i tambuim ol gay na lesbian pasin long kantri.

Dispela em ol man i poromanim man na ol meri i poromanim meri.

Watson Gabana em edvokesi opisa bilong Kapul Champions long PNG i tok gavman bilong Papua New Guinea i mas rausim ol loa em i gat egensim ol gay pipel o ol man i save laikim ol man na ol meri i save laikim ol meri, o ol trenjenda.

Dispela em askim bilong Kapul Champions, wanpela NGO em i sanap makim ol gay na trenjenda pipel long kantri.

Askim bilong ol i kamap bihainim Human Rights Film Festival i bin kamap long PNG long wik i go pinis. Long wik bihain, em bai go long Bogenvil.

PNG i no gat loa o em i gat ol strongpela loa egensim Homosexuality, maski sapos i gat planti gay pipal long kantri.

Toktok long RAMS i kamap long Solomon Ailan

Wanpela mansave bilong Solomon Ailan i tok intavensen o kamap bilong Regional Assistance Mission to Solomon Ailans em long sait bilong sekuriti.

Dokta Tarcisius Tara Kabutaulaka em Asosiet Profesa long Solomon Ailan

i tok Australia i go pas long dispela intavensen long Solomon Ailans long wanem, em i wari long ol intanesenel teroris i go long Solomon Ailans.

Sait long loa na oda long Solomon Islands, i bagarap olgeta long taim bilong riginol intavention long Julai 2003.

Solomon Ailans planti taim ol i save tok makim bikpla wok em RAMSI i bin mekim long hap olsem em i wankain liklik olsem ol bikpela wok long Iraq na East Timor.

Tasol wanpela mansave long ol wok politik long rijon na man husat i bin helpim gavman long lukluk long dispela wok long yia i go pinis i tok, dispela kain toktok i no stret tumas.

Jon Fraenkel, Professor of Comparative Politics long Victoria Yuniveisti Nu Silan na man husat i bin raitim ripot long RAMSI i bin givim wanpela tok-tok bilong en long dispela ripot tude long Australian National University long Canberra.

Ol poto long greduesen bilong 16 yangpela ami kedet long PNG Difens Akademi, Igam Bareks long Lae, Morobe Provins long las wik Trinde.



REDI LONG GREDUESEN:Gavana Jenerel Gren Sif Sir Michael Ogio i glasim ol ami opisa bipo long greduesen. 16 opisa opisa kedet i bin kamap olsem ol Seken Leftenen long PNG Difens Fos i stap namel long dispela grup.



MAS: Tupela meri tasol i bin greduet long dispela kos wantaim 14-pela man. (Namel) Opisa kedet Mileona Saroa i wanpela long ol na em i mas pas wantaim narapela tupela man wanskul na wanwok bilong em long taim bilong greduesen seremoni long Igam Bareks, Lae.



Opisa kedet Jacinta Moiya em narapela meri husat i greduet long dispela kos i kisim setifiket long Gavana Jenerel, Gren Sif Sir Michael Ogio. Ol Foto: Gavana Jenerel Midia.

Gavman bai lukluk long hevi bilong Asialiam Sika: Pato

Stanley Nondol i raitim

MINISTA bilong Foren Afes, Rimbink Pato i tok gavman i toktok yet long stretim ol sampela hevi bilong Manus Asailam Sika.

Mista Pato i tok ol sampela toktok we i wok long kamap nau namel long gavman bilong Australia na PNG em long lukluk long stretim ol sevis olsem mani na developmen ol pipel na provinsal gavman bilong Manus bai kisim aninit long agrimen na

polisi bilong Asialiam Sika.

I gat komplek i kamap olsem Manus Provinsal Gavman i no kisim sevis bilong mani i kam long Australia gavman long ol developmen i kamap long Manus Asialiam Sika senta.

Memba bilong Manus Ronney Knight i tok aninit long agrimen bilong Asialiam Sika namel long gavman bilong PNG na Australia, i no gat rot long Manus Provinsal gavman bai kisim mani stret long Australia long developim ples.

Mista Knight i tok ol sevis Manus i kisim em long wanpela bilum o pekej bilong developmen Australia gavman i givim long developim Manus.

Minista Pato i tok ol toktok i go het yet namel long tupela gavman long ol dispela wari bilong Manus na PNG.

"Mipela long gavman i no lus tingting long ol hevi na wari bilong ol pipel bilong Manus, na gavman i save pinis long dispela na ol arapela hevi bilong Manus na

bai kamap wantaim gutpela ansa bihain long tupela gavman i pinisim olgeta toktok", Mista Pato i tok.

Minista Pato i makim kantri na go long bikpela kibung bilong UN Jenerel Asembli long New York i tok em i bin toktok wantaim planti lida long opim dua bilong PNG long wol.

Minista Pato long raun bilong em long miting i toktok wantaim Praim Minista bilong Australia, Tony Abbot long sait bilong Asailam Sika

long Manus, na long wok bilong Australan Federel Polis long kantri. Em i tok Mista Abbot i wanbel long PNG polis bai kisim trening long Australia.

Em i tok em bin toktok wantaim Seketeri Jenerel bilong UN long ol hevi bilong Bogenvil. Minista Pato i tok tenkyu long Sekreteri Jeneral long gutpela wok bilong UN long Papua Niugini.

Minista Pato i bin bung tu wantaim Presiden bilong USA, Barack Obama na tok

PNG i sapotim US long pait egensim teroris long wol.

Minista Pato i givim palnti ripot bilong PNG long ol wol lida na i tok planti kantri i amamas long wok wantaim PNG long planti rot bilong developmen.

Minista Pato long miting bilong Pasifik lida wantaim US Deputi Seketeri, Willaim Burns. Long dispela miting Minista Pato i tok Pasifik i mas developim rot bilong kisim helpim bilong US long Pasifik Ailan Forum (PIF).

Pipels Maikro Benk bai sapotim lokol SME

Gavman bai wokim brens long 22 provins

Stanley Nondol i raitim

GAVMAN i lukluk long wokim Pipel's Maikro Benk long olgeta provins long kantri na bai kisim bipo Papua Nihgini Benking Koporesen (PNGBC) i kam bek.

Tasol em bai mekim bisnis long narapela nem-Pipels Maikro Benk.

Wok bilong Pipels Maikro benk em long mekim benking sevis i go long olgeta manmeri bilong kantri, na bai helpim ol liklik bisnis long gro na apim ikonomi bilong kantri.

Minista bilong Komes, Tred na indastri Richard Maru, i tok ikonomi bilong kantri bai nonap gro sapos ol pipel i no mekim bisnis na i no gat mani.

Minista Maru i wok hat long lukim olgeta provins long kantri bai gat wan wan Maikro benk bilong ol yet kam yia 2017.

Long las wik Fraide, Minista Maru i bin givim K9 milien i go long Nesenel Developmen Benk ong wokim Pipels Maikro Benk brens long Tari, Aitape na long Arawa.

Rekot i tok 2-milien pipel tasol i yusim benking sevis long kantri.

Na Minista Maru i tok lukluk bilong gavman nau em long givim gutpela benking sevis long olgeta pipel bilong dispela kantri.

Em i tok husat i no yusim benking sevis i mas gat sans long yusim.

Em i tok dispela em i as tingting bilong O'Neill gavman na nesenel gavman.

Em i tok ministri bilong em i sapotim Pipels Maikro Benk long gro kwik long ol pipel i ken yusim sevis na kisim sapot bilong benk long ol liklik bisnis bilong ol.

Narapela bikpela samt-ing gavman i lukluk en em long Pipels Maikro Benk bai resis wantaim ol arapela komesel benk long kantri bikos ol komesel benk i stap pinis i save mekim hat long ol liklik manmeri opim akaun na kisim sevis.

Ol komesel benk i save askim long ID kad na planti askim moa long ol liklik manmeri. Dispela i save mekim pipel i les long go long benk na planti manmeri i save haitim mani long haus.

Minista Maru i tok plen bilong gavman em long wokim Maikro benk bilong ol pipel yet, na bai givim trening na stia tok long ol i mas gat pasin bilong sevim mani long bihain taim.

Minista Maru i tok kantri bai nonap luksave long gol bilong Visin 2050 long "kamap smat", "kamap vais", "kamap stret" na stap amamas long sosaiti sapos 80 pesen bilong populesen i no yusim benking sevis, na i stap turangu yet long ples bilong ol.

"Yumi mas groim fomol SME sekta, na wanpela gutpela rot em long mekim isi long ol liklik manmeri long ples long yusim ol sevis bilong benk. Na dispela i ken kamap isi taim yumi i gat benk bilong ol pipel yet, em Pipels Maikro Benk long olgeta provins na distrik," Mista Maru i tok.

Minista Maru i singaut long NDB long kwiktam wokim disain bilong brens long Tari, Kundiawa, Aitape, Arawa na Mendi.

Em i askim gavman long K20 milien moa long wokim 5-pela moa brens long Kiunga, Kokopo, Goroka, Manus na Lae.

PM amamas long Total kampani

PRAIM Minista Peter O'Neill i tok kantri na gavman bilong em i amamas long kampani bilong kantri France long wok bilong namba tu LNG projek bilong kantri long Elk-Entelope.

Mista O'Neill i mekim dispela toktok taim em i kisim ripot long ol eksekutiv bilong kampani long long dispela wik long wok kampani i mekim long Elk-Entelop.

Total kampani Vais Presiden, Arnaud Breavillac, i givim gutpela ripot bilong kampani taim em i mekim lukluk raun i kam long kantri long dispela wik.

Mista O'Neill i tok amamas olsem namba tu LNG projek i stap long gutpela mak.

Em i tok rivais sels na baim agrimen namel long InterOil na Total long mun Mas 2014 i kamapim gutpela rot long Total i kisim ol wokman i gat bikpela save bilong LNG i kam long kantri long developim namba tu LNG projek bilong Papua Niugini.

"Wok i kamap gut long Elk-Entelop ges fil long Papua i kamap gut. Total i amamas long wok wanataim gavman, join vensa kampani, ol patna na ol stekholda", Mista O'Neill i tok.

Long las yia, InterOil na Tital i holim midia konprens long taim bilong sainim rivais sels na sainim agrimen long Mas 2014.

Eksplorasen na Produksen Sinia Vais Presiden, Jean Marie Guillerrou i tok agrimen namel long tupela kampani bai lukim join vensa i kamap gut long LNG projek.

"Elk-Entelop em i bikpela projek long sait bilong Total na wantaim save na ekspirians long wol, wok bilong kampani long Papua Niugini bai givim bikpela sans long Total i groim bisnis long

Esia Pasifik rijon", Mr. Guillerrou i tok.

"Mipela i gat stongpela pren wantaim ol join vensa na strongpela sapot long PNG gavman na nau mipela lukluk go het wokim developmen bilong LNG projek", Mr. Guillerrou i tok.

Total em i namba 5 bikpela kampani we i gat nem long wol long Oil na Ges kampani. Em i gat 100,000 wokman na i wok long 130 kantri long wol.

Ol join vensa kampani bilong Elk-Entelop projek bilong Total em InterOil, Oil Search na gavman bilong Papua Niugini.

LOA siaman askim ol papagraun long lukautim Ramu NiCo Projek

OL PAPAGRAUN long Madang i mas lukautim dispela wanpela bikpela nikel/kobalt projek long provins bilong ol na tu, developa Ramu NiCo (MCC) bikos moa helpim bai kam taim dispela projek i go het yet.

Siaman bilong Kurumbukari Lenona Asosesin, Mathew Dengua i mekim dispela strongpela toktok long las wik Fraide taim ol mama bilong Kurumbukari na Inlen Paipain i kisim tupela nupela trak i kam long Wol Benk aninit long Nesenel Gavman progrem long sapotim ol meri insait long maining projek eria.

Mista Dengua i tok stat long kontraksen taim bilong Ramu NiCo projek yet long 2006 inap long 2010 i lukim planti ol bikpela infrastraksa wok olsem nupela rot na bris, skul, eid pos na ol arapela samting i bin kamap bikos long dispela projek tasol.

Em i tok bai gat arapela helpim moa tu i kam aninit



Siaman bilong KBK lenona asosesin, Mathew Dengua i givim toktok long Usino gavman stesen.

long 2013 Rivais MOA bilong Ramu NiCo Projek, olsem na ol pipel i mas stap isi na sapotim projek wok long ples bilong ol.

Mista Dengua i askim ol papagraun long lukautim Ramu NiCo na larim em i wok insait long seif na bringim arapela helpim i kam long ol pipel.

"Dispela tupela nupela trak yupela ol mama i kisim tude em bikos long stap bilong Ramu NiCo Projek long hia," Mista Dengua i tok.

"Moa, ol kain helpim olsem bai kam, olsem na mi askim yupela ol papagraun long lukautim gut Ramu NiCo Projek," em i tok.

Mista Dengua i tokim ol manmeri husat i bung long Usino LLG stesen olsem aninit long Ramu Projek Rivais MOA, planti moa impekt projek em ol i luksave long en pinis. Olsem na em i askim ol pipel long wok klostu na sapotim wok kampani i wokim long lukim ol projek ya i kamap na karim kaikai.

Long taim long lonsing bilong dispela tupela trak i go long ol wimens grup, Mista Dengua i tokim ol meri long ogenaisim ol yet gut na mekim bisnis bilong ol i gro. Taim ol i wok gut, Wol Benk i ken givim mani ken long namba tu hap bilong projek aninit long Minerol Risoses Atoriti (MRA). Mista Dengua i askim ol arapela stekholda na tu nesenel memba bilong Palamen na ol LLG presiden long wok bung wantaim na sapotim wok bilong ol meri long bringim ol developmen i kam long ples aninit long pablik-praivet patnasip (PPP) wok progrem.

BSP sapotim SME long K35milien

....Maru laikim benk sevis mas isi long ol pipel

Stanley Nondol i raitim

BIKPELA komesek benk long kantri, Benk Saut Pasifik (BSP) i tokaut olsem long rekot, em i sapotim ol liklik bisnis (SME) insait long kantri long mani mak bilong K35 milien.

Na benk i wok long go het na sapotim SME polisi bilong gavman.

Deputi Sif Eksektiv Opisa (CEO) bilong BSP, Johnson Kalo, i tok benk i wok long givim mani long ol liklik bisnis long kantri na i go het long sapotim ol liklik bisnis sekta long gro.

Mista Kalo i tok long rekot bilong BSP, i gat 12,000 SME.

Em i tok BSP i givim 700 lon o dinau mani long ol SME bisnis long kantri taim progrem bilong SMEi bin stat tripela yia i go pinis long mani mak bilong K35 milien.

Mista Kalo i tok ol bisnis BSP i bin givim mani helpim em ol bisnis i save ran long K3 milien long wanwan yia.

Mista Kalo i tok SME long kantri i gro kwik na benk i wok long givim sapot yet long helpim ol dispela liklik bisnis long gro na sapotim ikonomi bilong kantri.

Long rekot bilong BSP, planti ol SMEem benk i sapotim ol bisnis i stap long ol taun na siti.

Mista Kalo i tok benk i lukluk na wok hat long givim sapot long ol SME bisnis i stap long ol rurel komyuniti long olgeta rijon bilong kantri.

Long wanakain taim, Benk bilong Papua Niugini i kamapim fainensel litresi progrem long olgeta pipel long kantri i mas luksave long ol sevis benk i givim na ol mas yusim ol dispela sevis.

Planti ol fainensel institusen i wok long mekim wok aninit long BPNG long

skulim ol manmeri long olgeta hap long kantri long givim trening long ol fainensel save long ol pipel i mas klia long rot bilong bisnis, na rot bilong yusim mani na sevim mani.

Planti ol miting bilong BPNG na ol komesel benk na gavman tu i tok ol pipel bilong kantri i mas save long sevim mani na sevim mani i mas kamap pasin bilong ol pipel.

Sevim mani menesim mani em tupela bikpela topik we ol fainensel institusen i wok long tokim ol pipel long klia long en.

Long helpim ol pipel i kisim moa save long mani na helpim ol long kisim helpim bilong benk, gavman i wok hat long putim benk bilong ol pipel yet – Pipels Maikro Benk long olgeta hap bilong kantri.

Planti taim, ol pipel i save pilim pen long ol komesel benk i sasim ol planti benk fi. Na tu em i save hat long ol pipel i opim akaun long ol komesel benk bikos benk i save askim ol long ID kat na planti arapela askim moa.

Dispela kain pasin bilong komesel benk i lukim planti pipel i stap longwe long

benk Na em i hat long ol pipel i go askim benk long dinau mani long mekim bisnis bikos benk i no save long ol.

Ol dispela em wari bilong Minista bilong Tred Komes na indastri, Richard Maru.

Mista Maru i tok gavman bai wokim benk bilong ol pipel yet na em i wokim 4-pela brens na sampela brens bai kamap klostu taim.

Minista Maru i tok benk bilong pipel yet bai mekim isi long ol pipel long yusim ol sevis, opim akaun na kisim dinau long benk long mekim bisnis.

Marape i tok no gat fri mani

Stanley Nondol i raitim

MINISTA bilong Fainens James Marape i tok no gat fri mani na ol papagraun bilong ol provins i gat risos i mas nok en askim gavman long fri mani long statim bisnis. Ol i mas go kisim dinau long benk na statim bisnis na bekim lon o dinau.

Minista Marape i tok Nesenel Gavman i putim bikpela mani pinis long Nesenel Developmen Benk (NDB) na Pipels Maikror Benk long ol pipel bai kisim dinau na mekim bisnis.

Em i tok planti taim ol pipel i save go long ol memba, Dipatmen bilong Fainens, Tresari na Nesenel Plening na i save askim mani long ol i laik statim bisnis bikos ples bilong ol i gat ol planti naturel risos i stap.

Minista Marape i tok olgeta pipel bilong kantri i gat wankain rait long kisim helpim bilong benk, na i gat rot benk i putim long bihainim long kism dinau mani na i go kisim fri mani long gavman na ol memba bilong ol.

Minista Marape i bin makim gavman na i givim K9 milien long NDB long wokim



Minista bilong Fainens na Memba bilong Tari - Pori, James Marape.

tripela nupela Pipels Maikro Benk i tok ol pipel i mas save olsem gavman i statim Maikro Benk pinis. Na tu, putim bikpela milien kina long NDB long helpim pipel long kisim dinau mani na wokim bisnis.

Em i tok gavman long 2 o 3 yia taim bai daunim intreset bilong NDB long 6.5

pesen i kam daun na bai givim 40 yia long ol pipel i ken bekim dinau.

“Noken kam long Dipatmen bilong Fainens, Tresari o Nesenel Plening na askim long mani long statim bisnis. Y upela i go long NDB na Pipels Maikro Benk na askim long dinau long mekim bisnis, bikos gavman i putim

mani bilong yupela stap long dispela tupela benk long helpim yupela”, Minista Marape i tok.

“Gavman bai go het long wokim planti Pipels Maikro benk na sapotim NDB, putim planti mani long tupela benk long olgeta baset. Husat i laik wokim bisnis i mas go long hap. Mipela long gavman i laik sapotim ol trutru binisman na i no konman o pepa binisman”, Minista Marape i tok.

Minista Marape i tok gavman i wok patna wantaim NDB long sapotim ol pipel na nau i sapotim Benk Saut Pasifik (BSP). Em i pulim moa komesel benk long joinim gavman long sapotim ol pipel long stretpela rot bilong mekim bisnis.

“Dispela wok patna wantaim ol benk na sapotim NDB em i plen bilong gavman long sapotim ol pipel long go insait long bisnis, sevim mani na lukautim ol yet na helpim ikonomi bilong kantri long gro,” em i tok.

Minista bilong Tred Komes na Indastri i givim K9 milien long NDB long kirapim Pipels Maikro Benk long Tari, Arawa na Aitape.

Prais bilong petrol go antap, disil na kerosin kam daun

INDEPENDEN Konsuma na Kompetisen Komisn (ICCC) i tokaut olsem i gat sampela senis i kamap long prais bilong petrol, kerosin na disil long mun Oktoba.

Prais bilong petrol go antap na prais bilong kerosin na disil i kam daun.

ICCC i tokaut long dispela bihain long em i kisim toksave long piul saplaia, Puma Energy taim kampani i skelim interim praising agrimen we kampani i wanbel wantaim gavman.

Komisina bilong ICCIC, Dokta Billy Manoka i tok wok skelim bilong piul prais bilong Puma Energy i soim olsem prais bilong piul long Oktoba i senis.

Nupela prais bilong piul em;

Prais bilong petrol i stap long K1.90 long wanwan lita long Oktoba. Long mun Septemba, em i bin stap olsem K1.89 long wanpela lita. Prais bilong disil i kam daun long K1.94 long Oktoba. i bin K2.00 long mun Septemba. Na prais bilong kerosin i kam daun long

K1.93 long Oktoba na long Septemba bin stap long K1.98.

Dokta Manoka i tok prais bilong disil na kerosin i kam daun long Oktoba na petrol i go antap long impot Parity Price (IPP) levol. Tasol long averej mak bilong IPP, prais bilong olgeta i kam daun long mun Oktoba.

Dokta Manoka i tok piul prais i kam daun bikos krud oil prias long wol maket i senis.

Em i tok bihain long glasim gut olgeta prais long IPP levol, averej bilong domestik ritel prais bilong kago long kantri tu bai senis.

Em i tok prais bilong olgeta sevis stesen bai senis.

Long dispela senis bai lukim prais bilong petrol i go antap long 2.06 t, disil i kam daun long 5.73t na kerosin kam daun long 5.15t.

Dokta Manoka i tok em i wok bilong ICCIC long mekim wok long lukim ol pipel i baim long prais em i tokaut long en.

CHECK-IN FAST! CHECK-IN ONLINE!

Avoid the airport queue *Online Check-in is available from 24 hours to 3 hours before departure.

Air Niugini www.airniugini.com.pg

Book Flights My Flight Book Hotels

Online Check in

Last Name

Booking Reference

Check In

Manage My Booking

Buy Duty Free



DEC Tokim Basamuk Pipel Ripot blong DSTP

OL FIS na animol laip i stap orait na tu sindaun bilong pipia long Basamuk dip si teillings plesmen (DSTP) sistem em Ramu NiCo Projek yusim i stap orait na i no inap bagarapim laip bilong ol manmeri long Raikos na Madang provins.

Gavman lain blong Dipatmen ov Envairomen na Konvesen (DEC) i tokaut long ol pipel bilong Basamuk eria long Raikos distrik long Madang provins olsem nogat wanpela bagarap i kamap long ol laip bilong animol na pis insait long solwara long Basamuk klostu long dip si teillings plesmen (DSTP).

Wanpela tim bilong gavman (DEC) long las wik i bin go givim aweanes long ol viles arere long Basamuk Rifaineri bilong Ramu NiCo (MCC) long tokaut long wanem ol wok painimaut i bin kamap long dip si teiling plesmen (DSTP) sistem.

Dispela aweanes em Nesanel Kot i bin givim oda long en long mas kamap long olgeta tripela mun long toksave long ol pipel arere long Basamuk eria na tu givim ripot i go long olgeta stekholda insait long Ramu NiCo Projek.

Tim husat i bin wokim aweanes we i bin stat long Fonde, Oktoba 2 long Mindre viles em Dokta Lemas Pangum, wanpela maining edvaisa wantaim DEC i go pas long en.

Ol arapela opisa em DEC opisa Gabriel Luluaki na Helt, Sefti na Envairomen (HSE) tim bilong Ramu NiCo em Steven Opur na Philip Atio. Ramu NiCo CA tim i bin go pas long ogenaisim ol aweanes wantaim Ramu NiCo CA aweanes opisa Mathew Lem. Ol aweanes long ol viles long Basamuk tu i bin gat ol opisa bilong Madang provinsal gavman i raun wantaim tim.

Narapela hap bilong aweanes i bin go long Ganglau viles na Tugyak, klostu long Basamuk eria.

Dokta Lemas i tokaut long ol manmeri long Mindre viles olsem bikpela wok painimaut ol independent lain em lan Hargreaves na Asosiets, na tu DEC i painimaut olsem ol pipia o teillings bilong Ramu NiCo we i go insait long solwara yusim DSTP i no suruk i kam antap gen.

Moa long en tu ol dispela pipia i go sindaun daunbilo tru na we em ples tutak tru na ol fis blong rif na ol arapela samting antap i no inap long kaikai na givim sik long ol manmeri.

Bikpela ripot bilong wok painimaut we Dokta Lemas i tokim ol manmeri long ples em olsem laip bi-



Dr Lemas i harim lokal man blong Mindre viles Terry Kunning i toktok wantaim MRA liason opisa Nicholas Waipuk long Mindre viles.



Dokta Lemas i karim ol dispela graun na sempol i go long Australia na i bringim ripot i kam tokim ol pipel long Basamuk.



Ol wok lain bilong DEC i daiv long solwara long kisim ol sempols.



Ol koral rif arere long Basamuk Rifaineri i orait na stap klin arere long Ganglau viles.

long ol pis na animol aninit long flua bilong solwara i no bungim hevi. Dispela wok painimaut long mun Epril we wanpela indipenden konsalten i painimaut i soim tu olsem wanem laip ol animol na fis aninit long solwara long Basamuk i stap em wankain olsem ripot i stap long 2007 Bes-lain sevei o wok painimaut we i bin kamap long dispela taim.

Dokta Lemas i tok klia tu long ol pipel olsem i no gat senis i kamap

long ol envairomen aninit long solwara long laip biling ol koral rit na tu namba bilong ol fis. Dispela i soim olsem wok painimaut long 2013 we lan Hargreaves na Asosiets independent konsalten i luksave olsem ol koral rif na populesin o namba bilong ol fis insait long solwara stap wankain yet olsem long 2007 na nogat bikpela senis i kamap.

Dokta Lemas i toktok long stadi na wok painimaut bilong dispela independent konsalten we DEC i wan-

taim Ramu NiCo askim ol long kari-maut wok. Dispela lain i karimaut wok painimaut long ol wir, marin fauna, antap bilong solwara, tait bilong solwara na dauntil na tu okastik sibed klasifikesen. Wok painimaut ya i karamapim ol ples o eria long Basamuk i go long Saidor i to olgeta long Alexishafen, Rivo na Madang eria.

Bihain long dispela wok painimaut tu i soim olsem ol pis blong rit we ol stadi lain i katim bodi na lewa

blong ol i painimaut olsem nogat ain o marasin nogut i stap insait long bodi long ol. Dispela rekot i soim olsem wanem stadi i bin kamap long Bes-lain sevei long 2007 i soim wankain mak nau i stap long wok-painimaut we i kamap long pinis bilong yia 2013.

Wok painimaut i soim tu olsem dispela ol paip na we i go daun 150 mita daunbilo long solwara long Basamuk Be i em i stap orait na nogat bagarap long en.

RAMU NICO **Ramu NiCo redi long givim**
 Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.
 Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.
Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biling i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

Wanpela Ramu NiCo, Wanpela Komuniti

Agmark amamas long salim ol egrikalsa saplai long Raikos

James G. Kila i raitim

BIKPELA didiman saplai kampani long kantri, NGIP-Agmark, i amamas long wok bung wantaim Basamuk Kakao Kopretiv Sosaiti Grup (BCCSG) long Raikos distrik, Madang long bringim ol fam saplai na ol tul i go klostu long dua bilong ol manmeri long ples.

Agmark Kakao menesa long Madang, Elias Tomon i tokaut long dispela las wik Fonde bihain long em i bung wantaim siaman bilong BCCSG, Tony Gaiyu wantaim ol komyuniti Afes Dipatmen opisa bilong Ramu NiCo long opis bilong ol long Madang.

Dispela miting bai lukim Agmark Kakao Madang brens bai sainim wanpela memorandum ov andastending (MOU) long lukim wok i stat klostu taim.

Dispela i namba wan taim tru wanpela bikpela kampani bai wok wantaim ol fama grup long bringim ol sevis i go daun tru long helpim ol rural pipel.

Mista Gaiyu i tok ol i painim



Agmark Kakao menesa, Elias Tomon (namba tri long lephan), Mista Paining long lephan na ol egrikalsa na bisnis developmen opisa bilong Ramu NiCo (MCC) i amamas bihain long miting. Poto: James G. Kila

graun pinis long sanapim wanpela wea-haus na wanpela riteil saplai stua long Basamuk we ol bai stat salim ol tul na egrikalsa saplai i go long ol manmeri long ples.

Kamap bilong dispela

egrikalsa saplai stua bai helpim gut ol manmeri husat i save westim mani na taim long go long Madang taun na baim ol samting. Kos bilong motobot long go long Madang em K50 long wan

wei, na long go bek em K100.

Mista Tomon i tok Agmark Kakao long Madang i amamas tru long kamap wantaim dispela wok bung long bringim ol fam saplai i go klostu long haus dua bilong

ol fama long ples.

Em i tok dispela tu i helpim stret ol fama o lain bilong ples long no ken westim taim na mani long baim moto-bot long go long taun long baim wanpela bus naip

o arapela samting na putim ol yet long birua long solwara.

Mista Tomon i mekim dispela toktok tu bihain long sampela lain klostu long Basamuk eria i bin bungim hevi long solwara long las wik Mandé taim bot i kapsait na sampela lain i lus. Tripela lain i bin lus long dispela birua namel long Madang na Raikos long solwara bilong Astrolabe Be.

Mista Tomon i Agmark i amamas long Ramu NiCo (MCC) long putim moa luksave long agrikalsa na wok long helpim ol pipel insait long projek eria bilong en.

Ramu NiCo Komyuniti Afes Jeneral Menesa, Martin Paining i bin bungim wantaim Mista Tomon na ol CA opisa na i sapotim tru dispela wok bung namel long Agmark na BCCSG.

Mista Paining i tok egrikalsa em i bikpela samting tru bikos bihain long maining projek i pinis, ol pipel bai go bek long egrikalsa long lukautim sindaun bilong ol.

YUS Konsevetiv i go bek long papagraun

Bustin Anzu i raitim

KONSEVETIV eria long Kabwum insait long Morobe provins i kisim wok bilong ranim na menesim wok bilong konsevesen i go long han bilong ol yet bihain long 20 krismas.

Tree Kangaroo Conservative Program o KTCP i givim dispela wok bilong ranim wok bilong lukautim konsevetiv eria o graun, bus, wara na ol wel abus i go bek long ol manmeri long ples yet long lukautim.

Yus Lokol Level Gavman long Kabwum i gat wanpela bikpela hap bus em ol i givim i go long dispela wok. Dispela wok em long lukautim wanem samting i stap long bus, na i no inap long bagarapim.

Long las mun tasol, dispela hap eria long Yus i kisim luksave bilong Nesenel Gavman na i go daun long Nesenel Geset. Dispela nau i soim olsem Konsevetiv eria long Yus i gat luksave bilong nesenel gavman nau.

Dispela nau i min olsem bus, maunten, wara na ol wel abus i stap insait long dispela bus em pipel na publik bai ol i ino inap long holim na kilim o bagarapim. Ol i mas stap insait long dispela hap graun bilong ol yet.

Morobe Gavana Kasiga Kelly Naru i luksave long dis-



Yus Tree Kangaroo i sanap wantaim ol lidaman bilong Yus, Gavana Naru (2nd right) na Dadae long ples Isan long wiken.

pela na putim sampela mani long strongim dispela wok.

Naru i bin go long ples Isan long Yus long wiken na mekim komitmen long givim K150, 000 long Tree Kangaroo Conservation Program long baset bilong neks yia.

Em i tok insait long kantri, i nogat kain ples olsem i stap, we ol manmeri i givim bus bilong ol long dispela kain wok bilong lukautim bus bilong ol

na dispela em i namba wan taim ol i lukim dispela.

“Yupela ol pipel bilong Yus i trupela manmeri long luksave long bus bilong yupela na pasim i stap. No gat kain bus olsem nau i stap. Olsem na bai mi sapotim dispela program,” Mista Naru i tok olsem taim em i sanap witnesim dispela bung long ples Isan.

Long wankain taim,

Memba bilong Kabwum Bob Dadae i putim K100, 000 na Siaman bilong Environment na Conservation, Mining, Climate Change na Presiden bilong Yus Lokol Level Gavman Epemu Kiwenu i givim TKCP K50, 000 long sapotim na strongim dispela wok bilong ol. Bungim olgeta, ol lidaman i putim K300, 000 bilong helpim Tree Kangaroo Conservation Program long

igo het yet.

Naru i tok planti bus insait long kantri bilong ol i no save tingting long bosim ol bus bilong ol tasol ol manmeri bilong Yus i mekim bikpela samting we gavman tu i save long dispela na givim pas pinis olsem dispela bus bilong ol em i ples tambu nau.

Dispela konsevetiv eria i gat samting olsem 150, 000 hekta insait long 4-pela zon.

Ol PNG ekspota i sindaun long woksop

MOA long 400 asples PNG ekspota o lain i save salim ol samting ol i wokim i go ovasis long egrikalsa na menufeksaring sekta i sindaun long ol woksop long Lae, Morobe Provins long kisim moa save long strongim na helpim ol long wok bilong ol.

Menesing Dairekta bilong Invesmen Promosen Atoriti (IPA), Ivan Pomaleu i bin opim woksop bai ran long 4-pela de long Lae Intanesenel Hotel.

Mandé na Tunde i lukim ol lain i sindaun log Pacific Path to Maket woksop taim aste na tude i lukim ol lain i sindaun long Exporting Pacific- EU Food Ingredients.

Ol intanesenel spika na ol savaman long sait bilong tred i kam long Saina, Nu Silan, Australia na Yurop, na sampela tu i kam long PNG bisnis sekta.

Ol eria we ol i kisim long dispela woksop em long ekspot bisnis, lukluk long ol intanesenel maket ol i makim long ol, save long ri-jinol tred agrimen na protokol, redi long ekspot na painim na toktok wantaim ol intanesenel baiya.

Husat i laik save moa i ken kontekim Julienne Leka long telipon 3084417 o email jleka@ipa.gov.pg

Digicel Kap (All Stars) tim i redi

KOSA bilong Digicel Kap (All Stars) tim, Stanley Tepend, husat i kosa bilong Lae Snax Tigers tu, i tok olsem tim bilong em i redi long salensim Konfederet tim long dispela mun.

Ol pilaia bilong Konfederet tim em ol top pilaia we ol selekta i bin makim long taim bilong Nesenel Sempionsip long las mun.

Mista Tepend i tok Digicel Kap tim i gat planti ol yangpela pilaia, na ol i trening strong stat long las mun yet.

Ol pilaia bilong Digicel Kap tim i kam long 6-pela tim insait long kompetisen. Pot Mosbi Vipers i gat 5-pela pilaia, Hela Wigmen na Lae

Snax Tigers i gat foapela, Mioks na Gurias i gat tupela na Lions i gat wanpela.

Olgeta pilaia i bin trening long wan wan ples ol i stap long en, na long Mande long dispela wik, ol i kam bung.

Olgeta pilaia bai go long Kokopo long Fonde.

Mista Tepend i tok dispela em gutpela sans bilong ol pilaia bilong Digicel Kap long soim save na skil bilong ol, long wanem, ol bik lain bilong Australia bai kam lukluk tu.

Em i tok sapos ol i pilai gut na winim tingting bilong ol selekta, ol bai gat sans long go pilai long Australia, na tu, pilai long Hunters skwat long neks yia.

Mista Tepend i tok dispela pilai bai wanpela strongpela pilai, long wanem, Konfederet tim bai gat ol gutpela yangpela pilaia.

Em i tokim ol pilaia bilong em long no ken luk daun long ol pilaia bilong Konfederet tim, long wanem, ol tu bai traime long win, na ol i no inap long givim sans nabaut.

Papua Niugini Nesenel Ragbi Lig (PNGNRL) na Digicel i wok strong long sapotim Digicel Kap (All Stars) tim long helpim ol long redi bipo long ol i pilai.

Digicel Kap (All Stars) tim em;

Atte Bina Wabo (Tigers)
Elijah Riyong- (Vipers)

Enoch Maki (Vipers)
Samuel Koim (Vipers)
Blend Abavu- (Vipers)
Stargroth Amean- (Vipers)
Wesa Stanza (Wigmen)
David Lapua (Wigmen)
William Mone (Wigmen)
Ben Hetra (Wigmen)
Henry Wan (Tigers)
Ryan Kiso (Mioks)
Rex Yalon (Tigers)
Jeffery Maino (Tigers)
Roy Kela (Tigers)
Mal Essena-(Lions)
Travis Waninara (Gurias)
Ase Boas (Gurias)

Opisal:
George Tobata- Opisal
Trena
Stanley Tepend- Kosa
Andy Ankiki- Asisten Kosa

Tupela ragbi lejen bai kam long PNG

TUPELA biknem pilaia bilong NRL long bipo, Andrew Johns na Gordon Tallis, bai kam long Papua Niugini long pinis bilong dispela mun.

As bilong raun bilong dispela tupela pilaia em long lukim Pacific Assurance Group's VIP brand launch event long Pot Mosbi.

David Mead bilong Gold Coast Titans tu bai kam wantaim dispela tupela biknem ragbi pilaia bilong bipo.

Raun bilong dispela tupela biknem spot man bai lukim ol i ranim ol liklik ragbi program (PAG Footy Legends Clinic) wantaim ol



Andrew Johns



Gordon Tallis

yangpela pikinini bilong Papua Niugini husat i save gat bikpela laik long pilai ragbi lig.

Sif Eksekutiv Opisa (CEO) bilong PAG, Paul Af-

fleck, i tokaut i go long ol het tisa bilong ol hai skul na kosa bilong ol skulbois ragbi tim long makim sampela bilong ol yangpela sumatin husat i save pilai ragbi long stap in-

sait long dispela program.

Mista Affleck i tok dispela program bai givim sans long ol yangpela long kisim sampela skul aninit long tupela biknem ragbi pilaia long wol.

Em i tok PAG i amamas long kisim dispela tupela biknem pilaia i kam long kantri, na tu, serim ol dispela tupela biknem pilaia wantaim ol pipel bilong Papua Niugini.

Mista Affleck i tokim ol het tisa olsem PAG i laikim ol yangpela ragbi pilaia husat i stap aninit long 18 krismas long stap insait long dispela program.



LLG na Spot Dvelopmen

OLGETA Lokel Level Gavman (LLG) insait long kantri i gat bikpela wok long mekim long spot dvelopmen.

Olgeta distrik na ol LLG i save kisim fainensel sapot, na ol i mas yusim dispela mani ol i kisim long go het long dvelopim spot long wan wan eria bilong ol. Ol i no ken paulim dispela mani bilong spot, long wanem, ol pipel bai kisim taim.

Ol manmeri husat i wok long LLG i save long gutpela rot ol i mas bihainim oltaim long dvelopim spot long wan wan eria bilong ol.

Insait long wan wan LLG, i gat ol wod, na ol lida bilong wan wan wod i mas wok bung wantaim LLG. Ol lida bilong ol wod mas givim olgeta infomesen we LLG bai nidim.

Sapos ol lida bilong wod i no wok bung wantaim LLG, ol pipel bai no inap long lukim gutpela senis.

Long raun bilong mi long planti LLG insait long kantri, mi lukim olsem sampela wod insait long kantri i wok gut wantaim LLG na ol i gat ol gutpela fasiliti bilong helt, edukesen na sios.

Sampela wod i gat ol gutpela fasiliti i stap pinis tasol ol i bagarap na ol lida i mas painim rot long stretim ol.

Sampela wod i no save luksave long spot, na ol i save putim spot long bihain na planti mani i save go long edukesen, helt na sios.

Spot em i wanpela bikpela samting long grasrut level, na sapos ol LLG i putim moa mani long sapotim spot, ol bai lukim planti gutpela senis i kamap long ol komyuniti bilong ol.

Em tasol na gutpela wiken long olgeta

Manus winim Besta FA Kap

SOKA tim bilong Manus i winim Besta FA Kap long las wiken taim ol i pilai long Lae na daunim tim Lae 3-2.

Tupela tim i bin pilai wanpela strongpela gem tru. Tupela tim wantaim i bin gat planti sans long skoa, na tupela tim wantaim i bin strongim difens bilong ol.

Planti manmeri i bin ting olsem Lae bai win, long wanem, ol i bin pilai long ples bilong ol.

Gavana bilong Manus, Charlie Benjamin, wanpela lida husat i save bihainim gut tru soka i tokaut bihain long ol Manus i winim Lae long Sarere olsem Mande bai pablik holid bilong ol.

Dispela tok bilong em i soim olsem em i amamas tru long ol yangpela soka pilaia bilong provins long winim Besta FA Kap.

Long divisen bilong ol meri, Madang i winim Kimbe 3-2.



Murray Bareks pulim planti pikinini

Lukim ol poto long pes 27

Isaac Liri i raitim

LONG las mun, Praitim Minista Peter O'Neill wantaim Spot Minista Justin Tkatchenko na Difens Minista, Fabian Pok, i bin opim Murray Bareks Spot Fasiliti long Pot Mosbi.

Dispela spot fasiliti i gat

swimming pul, jim na wanpela hol.

Planti manmeri na pikinini insait long Pot Mosbi i wok long yusim dispela fasiliti nau. Long ol wiken, bai yu lukim planti skul pikinini i go long hap long pasim taim na ekse-sais.

Long las wiken, *Wantok Niuspepa* i bin bungim planti skul pikinini long hap, na stori wantaim ol.

Long tingting bilong ol dispela yangpela, ol i amamas tru long yusim dispela fasiliti, long wanem, em i helpim ol long ekse-sais na stap helti

na strong.

Sampela ol papa na mama i tok ol i amamas tru long lukim dispela kain spot fasiliti. Ol i tok em bai helpim ol pikinini bilong ol long stap longwe long ol kain kain rabis pasin olsem dring bia na smuk mariwana long wiken.

Dispela spot fasiliti em gavman i yusim K7 milien long kamapim. Spot Minista Justin Tkatchenko i tok bin bipo olsem dispela fasiliti em bilong pablik.

Olsem Minista bilong Spot, em i laikim ol manmeri long komyuniti long stap helti na strong.

PM 13 Kangaroos kisim planti yangpela pilaia

OL nesenel selekta bilong Australia i bin makim PM 13 Kangaroos tim wantaim helpim bilong PM 13 Kangaroos kosa Laurie Daley na nesenel kosa Tim Sheens.

Mista Sheens i bin tokim ol midia long Australia olsem PM 13 Australia tim bilong dispela yia i gat planti yangpela pilaia, na wan wan pilaia em ol i gat ekspiriens.

Em i tok dispela PM 13 salens long Papua Niugini bai givim gutpela ekspiriens long ol yangpela pilaia bilong Australia.

"Sapos ol i pilai gut, ol bai

gat sans long pilai wantaim Kangaroos long 4 nesen salens egensim Nu Silan, Ingran na Samoa long pinis bilong dispela mun," Mista Sheens i tok.

Ol sampela bilong ol yangpela pilaia em Matt Moylan, Josh Mansour, Sione Mata'utai, Anthony Milford and Dylan Napa.

Ol pilaia husat i gat ekspiriens em Greg Bird, Robbie Farah na Ryan Hoffman.

Australia i bin makim planti ekspiriens pilaia tasol ol i gat bagarap olsem na ol i givim sans long ol yangpela.

PM 13 Kangaroo Skwat em:

Matt Moylan	(Penrith)
Josh Mansour	(Penrith)
Will Chambers	(Melbourne Storm)
Sione Mata'utia	(Newcastle Knights)
Daniel Tupou	(Sydney Roosters)
Anthony Milford	(Canberra Raiders)
Ben Hunt	(Brisbane Broncos)
Aaron Woods	(Wests Tigers)
Robbie Farah	(Wests Tigers)
Josh Papalii	(Canberra Raiders)
Ryan Hoffman	(Melbourne Storm)
Beau Scott	(Newcastle Knights)
Greg Bird ©	(GoldCoast Titans)
Michael Morgan	(North Queensland Cowboys)
Brenton Lawrence	(Manly Sea Eagles)
Josh McGuire	(Brisbane Broncos)
Dylan Napa	(Sydney Roosters)
Jack Wighton	(Canberra Raiders)

Tuquri; wanpela olupela pilaia long winim gren fainel

WANTAIM krismas bilong em i stap olsem 35, Lote Tuquri i kamap wanpela olupela pilaia long winim gren fainel long NRL taim South Sydney Rabbitohs i winim Bulldogs long las wiken.

Namba wan taim bilong em long winim gren fainel em long 2000 taim em i bin pilai wantaim Brisbane Broncos.

Tuquri i tokim ol midia long Australia olsem i no gat planti pilaia i save winim gren fainel taim krismas bilong ol i stap 35 na i go antap, na em i amamas tru long kamap olsem wanpela pilaia husat i winim gren fainel taim em i 35.

Kosa bilong em long Souths, McQuire, i lakim



Lote Tuquri

Tuquri long pilai wantaim Souths gen long neks yia, tasol Tuquri yet bai mekim disisen long stap bek o nogat.



DANIEL TUPOU:

Daniel Tupou em man nogut, husat long Kumuls bai makim em?


GREG BIRD: Kepten bilong Gold Coast Titans, Greg Bird, bai stap olsem kepten bilong ol PM 13 Australia Kangaroos taim ol i salensim ol PM 13 Kumuls long dispela wiken long Kokopo.

ROBBIE FARAH: Huka bilong Wests Tigers na NSW Blues, Robbie Farah, em namba wan pilaia bilong Australia long pilai planti PM 13 gem long Papua Niugini.

OI spot poto long wiken...

OI skul pikinini i redi long go insait long Murray Bareks Spot fasiliti.

OI Poto Isaac Liri.



KALAP! Wanpela liklik mangi i amamas tru na kalap i go insait long swiming pul long Murray Bareks Spot Fasiliti.

Planti skul pikinini i wok long pasim taim long nupela Murray Bareks swiming pul long wiken.



Skul bois tim bilong St Peter's long Erima i trening bipo long ol i go pilai.



Pilaia bilong Ted Diro i pilaim bal bihain long ol i takolim em.

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



TUNA IN OIL

Moa oil na meat insait

Planti Hunters long PM 13 skwat

Namba ten yia bilong PM 13 pilai long kamap...

Isaac Liri i raitim

PLANTI pilaia bilong PNG Hunters i stap insait long Praim Minista 13 skwat bilong Kumuls long dispela yia.

Kumuls PM 13 skwat bai salensim ol PM 13 skwat bilong Australia Kangaroos long dispela wiken (Sande) long Kalabond ples bilong pilai long Kokopo.

Ol Hunters pilaia husat i stap insait long PM 13 skwat em Israel Eliab, Sebastian Pandia, Adex Wera, Edward Goma, Garry Lo, Thompson Teteh, Brandy Peter, Timothy Lomai, Lawrence Tu'u, Noel Zeming, Jason Tali, Albert Patak na Wartovo Puara.

PM 13 pilai em wanpela bikpela ragbi lig pilai we i save kamap long soim gutpela wok pren Papua Niugini na Australia i gat, na tu, dispela pilai i save promotim ol bikpela isu we i save bagarapim ol komyuniti long Papua Niugini.

Isu bilong promotim long dispela yia, em violence against women wantaim het tok, Strong men don't fight women. Long Tok


Pisin bai yumi tok, strongpela man i no save paitim meri.

PM 13 pilai namel long Australia na Papua Niugini i bin stat long 2005. Long 2005 i kam inap nau, Papua Niugini i no winim wanpela pilai yet. Long 2007 ol i bin dro wantaim Australia 24-24. Dispela yia em namba ten yia bilong dispela pilai long kamap.

Asisten Kosa bilong PM 13 Kumuls, na kosa bilong ol Hunters, Michael Marum, i tok sapos ol i winim dispela pilai long dispela yia, em bai soim olsem level bilong ragbi lig long Papua Niugini i go antap.

Kosa Marum i amamas tu long lukim olsem planti pilaia bilong em long Hunters i stap insait long skwat. Em i tok em i gat strongpela bilip olsem ol i ken pilai gut aninit long gemplen bilong het kosa Mal Meninga.

Long 2005 i kam long 2012, Mal Meninga i bin stap olsem kosa bilong PM 13 Kangaroos, tasol stat long las yia i kam nau, em i stap wantaim ol Kumuls.



Featured Products

- *Treated Mosquito Nets Prevents Malaria
- * Visitect Tests for Malaria
- * Arterakine Tablets Treat Malaria (artemether & piperaquine phosphate)

Good Products, Better Prices, ikam long.

Johnstons Pharmacies Ltd

Phone 325 3185 Fax 325 0190 Email sales@johnstons.com.pg